

明
詩
紀
事

明詩紀事

貴陽陳田輯

辛鑑

王屋一首

屋字孝峙初名曉字蘭九嘉善人有學可齋詩箋

靜志居詩話孝峙以詩受知魏忠節因與忠節一門
羣從和酬詩類劉改之詞學辛幼安嘗過同里曹學
士齋學士曰先生尚能著履遠步耶應曰有太史公
不可無牛馬走鄉里傳爲新語
魏塘詩陳孝峙孤貧無家託身於郡大姓好爲詩顧
艾見而賞之載與俱歸爲延譽爲人修翬美丰神工
草隸華滑稽邑薦紳皆樂與之交

子夜歌

阿翁將嫁女問女願誰歸富室多爭寵貧家常苦饑

顧艾

一首

艾字病已一字匏青嘉善人有勸影齋自淺齋二集

魏塘詩陳病已與魏忠節父子比鄰友善持論未嘗苟合忠節稱其端士工詩歌家負郭被褐藜藿日中往往不舉火然門外多長者車轍遊郡城見王屋詩愛其才召與同居至共衣食廣為延譽屋遂得與邑士大夫交其論詩不必摹擬摹擬合則神情離如建章千門萬戶不襲阿房故址新豐締造徒欺田舍翁耳持論甚精既引王屋交於邑士大夫憚病已剛樂與屋交屋晚起家為富翁而病已家益貧苦吟歲為詩以百計未嘗有所干於人曹宗伯勸作贈王屋詩云猶勝桐村顧病已餓腸空煮鱸魚羹

秋葉

秋葉離披飲淚痕青紅間色映柴門吹殘將次孤巢影落盡
無由底本根詎怨霜風今已甚反嫌雨聲昔多恩天涯何處
容憔悴敢託寒爐此夜溫

陳衍二首

衍字磐生閩人有大江集

靜志居詩話磐生與徐興公同入曹能始閩風樓詩社而賦才儒鈍光焰鬱而不舒其自序比於春草蔓生秋蟲孤響良亦自得之言十五國風高言集田翬淵曰磐生詩風姿搖曳意態芊綿有落花依草之致

題邵大行薰亭

一片蒼山落案前
亭亭孤塔影嬋娟
林花乍落猶含露
池水新生卽有煙
蜨趁侍兒登佛閣
鶴隨門客上漁船
清光盡貯軒庭內
獨榻拋書抱石眠

上報國寺毘盧閣

十丈青蓮朵朵開
毘盧高閣獨崔嵬
欲看山勢連天遠
已見

三 卷之二 一
河流帶雨來宮樹陰濃秋未落塞鴻聲斷晚猶哀烽煙直北
何時息處處關門鼓角催

王履和 二首

履和字仲美邢臺人諸生

香山寺

金繩經百轉咫尺近清涼老樹經秋醉馴禽與客忘雲來千
澗沒雨過一山香每到無生地翻愁返故鄉

懊恨歌

情多易起惱歡久自生悲棄妾不恨恨郎愛妾時

麻三雍 一首

三雍字仲雍宣城諸生

怨王孫

灼灼嬌花解媚人
嚶嚶芳草獨傷神
那因芳草偏成恨
自是嬋娟不奈春

吳一元一首

一元字堯開宣城諸生

贈顧二娘

問酒青樓繫玉驄
梅花春伴小橋東
縱來歷亂猶堪惜
不學山蹊桃杏紅

何絳三首

絳字不偕一字孟門廣東順德人有不去廬稿

廣東詩粹不偕與陶璜梁棟陳恭尹暨其兄衡讀書西樵山中世稱北田五子

嶺表詩傳靈門於古體不喜李杜故卒少變化惟五
律最工起手

送黎雨亭再之惠州

非余偏惜別君去亦淒然霜葉臨江樹秋風下瀨船書期長
至後歸訂未行先莫戀西湖柳依依婀娜前

十四夜與吳山帶任肇楚蔭葡樓看月

涼風起中夜爲客動高吟與子詠明月誰人知賞心佳辰驚
節序方外散幽襟轉惜分攜後寒江白露深

郊居

郊西日將夕鳥雀何噉噉好月來平野微風過暮鐘草衰寬
石路木落出寒峯觀此芳菲盡悠然思嶺松

梁槿一首

槿字器圃廣東順德人諸生

陳恭尹獨漉堂集器圃弱冠補諸生有聲邇會遷移
盛年自廢結茅池西扁曰寒塘懸板橋以限往來非
其人不得入也好讀書晝夜不釋卷興之所至扁舟
獨往旬月忘返近郡名山羅浮西樵歲必一再登天
性高潔然不能獨居無朋友則不樂偶不至則輕裝
就之高談雄論觸緒英發遇世俗人終日不作一語
人初以爲傲久而親之知其無他也爲詩力追中唐
冲澹有自得之致

送何不偕之潮州

擾擾不得志客心安可論古關羸馬路窮海惡魚津驛葉行
邊落籬花到日新遨遊無不可天地一閒人

岑徵二首

徵字金紀一字霍山南海人諸生有選選樓集

蒼梧

日月開虞代風聲變五絃
牂牁流不返南狩是何年
瘴雨摧籬芷東風怨杜鵑
容華銷旅食淚盡百蠻天

湖南秋興

一雁下平蕪天空楚月孤
西風吹落葉秋色在南湖
欲學長沙傅投書屈大夫
三湘哀怨地懷古獨躊躇

易訓一首

訓字宣人新會人有東樵遺稿

廣東詩粹宣人性狷介嘗往匡山倚哀歌亭放聲大哭後適蒼梧得瘴疾卒

送一公還山

師今何處去相送出林間
一路隨芳草尋鐘歸舊山
猿聲深澗冷雲影上方閒
後夜遙相憶松門且莫關

英上 一首

上字卓今新會人諸生

谿上作

清谿一來往石上自潺湲驚立菱荷際蟬鳴槐柳間微風當
近水殘雨不歸山停棹待漁父相隨沽酒還

梁可潤 一首

可潤字元叔廣州順德人有狂仙遺草

進賢閣集元叔博學能詩性酷山水隱居羅浮其葛
緇川修煉故事自號三十二峯太狂長嘯仙

夜泊西灣

野水泠泠浸碧天西灣深處泊漁船千山月色孤蓬外半夜
潮聲一枕邊春夢覺來傷往事鄉心老去憶行年白頭不是

忘歸客獨對蘆花思悄然

庾樓一首

樓字本叔歸善人

次答張伯洪

白髮催遲暮高峯伴寂寥十年成底事一別又今朝但可花
經眼何當米折腰予山詞賦好遺恨向誰銷

趙煇夫二首

煇夫字裕子番禺布衣有草亭稿

過梅花村

乍識羅浮路梅花尙有村二三家映雪清淺水臨門古夢銷
香寂寒梢挂樹痕仙家歌舞罷山色幾黃昏

倚杖

莫上溪橋望斜陽
背晚鴉衰年仍作客
亂世已無家
斷雁煙迷影寒梅雪作花
片心搖欲折
淒切聽鳴笳

梁觀一首

觀字顒若南海人

廣東詩粹顒若詩有晚唐佳致

經亂泛舟甘溪作呈同侶

久無閒興到溪村
舊友同遊不半存
山色幾曾離釣艇
潮聲空自過僧門
路經兵後橋梁斷
林有人來鳥雀喧
身外問誰歸計得
樵漁相笑未開言

凌策八首

衆字水木一字木道南通州人諸生有冰雪攜竹灰

愁課等集

一經堂詩話水木遭世險噦沒身坎壈困窘詬辱胸
臆鬱鬱不得吐盡發之於詩其自序云奔林之發聲
愈蹙經霜之葉響愈淒又云性多感慨不能自同木
石支離荒忽莫識所之喜不期笑而笑怒不期詈而
詈幽緒無端弗可強已讀其全集大旨專主性靈有
竟陵之清機而不墮其魔瘴
田按水木詩幽咽似寒蛩令人留聽

諸弟姪見過

見人遙擬是今果到江干帶露一身溼放筇詢我寒燃松持
茗坐分石與雲看燭影分求宿江鷗暫避難

狼山晚步

亦是春遊客日西山自幽巖花逐水落谷鳥喚人留江靜欲

生月松深不待秋同心閒躡步汗漫更何求

夜過山寺

秋色冷一天此中人已眠白雲獨來去黃華寺門前凭閣得
山半依櫺見月全冥探思悄悄鈴鐸數聲圓

再過楊氏隱居

亦一居止見遐心曲徑經過尙費尋門欲向山兼得水屋因
在野遂成林桔橈方舉雨來疾機杼微聞雲隔深好結數椽
君左右記予此志已從今

獨吟

坐久黃葉落開閉竹扉聲忽問何人至石邊鶴影橫

投宿北山蘭若

帶霜披積莽逐月繞梧桐不厭幽人住山空一徑通

贈融上人

手闢荒山身欲老還將禪定對空江松檟寂聽皆成悟一任雲來自打窗

送張子歸陽羨

花落愁兼海燕飛家山此日筍初肥獨憐不及舟前柳一路青青相伴歸

楊時邇 二首

時邇字赤文南通州人諸生

重題雪竇

小閣出岑蔚何因清話同半窗月影上一枕水聲中涉趣無

拘礙覩心得妙空
顓師扶我醉深媿
酒顏紅

贈仁風上人

古廟香爐好作家
客來拈果復拈茶
芒鞋信踏村中草
竹杖閒挑陌上花
一滴曹溪分雪乳
六時香雨步金沙
相逢不識僧伽句
麾手楊枝拂面斜

淩谿庚四首

谿庚字季元南通州人諸生有薌圃草

山茨祖詩品薌圃草如市中賈客無物不有不必皆希世之珍

小除夕雨得書字

相驚寒較甚茲夕亦云除
雨雪天涯暮兵戈歲月虛
村醅期共醉短髮不禁梳
入夜檐聲急移床約舊書

范汝中邸中夜飲

歸期擬卜轉迢迢
賸得閒情付濁醪
竹葉於人差有意
燈花向客太無聊
江鄉歲晚愁無雁
旅邸風高感敝貂
近得南枝春信至
相將長耳策溪橋

登西樵臺望鍾阜諸山志感

霜林簇簇護丹梯
日照江門萬樹低
六代風流杯底盡
五雲宮闕望中迷
山應似我經秋老
鳥亦多情著意啼
金粉銷歸何處是
蕭蕭木葉下前溪

宿滬上口占

亂竹蕭蕭壓短垣
寒侵破壁一燈昏
暮愁風雪明朝惡
聞說梅花發遠村

陳宏裔 七首

宏裔字文起南通州人諸生有蒼雨詩集四卷

一經堂詩話蒼雨集我用我法深悟剽賊比擬之繆
卓卓可傳

田按文起詩殊爽健

宿雙溝道間題壁

暝色催涼雨投身荒圃間迹疏孤客窘人定百蟲閒遠望若
可卽舊山殊未還明朝須早起聒耳怪潺湲

留客

涼風生戶牖急雨下庭柯我正欲飲酒公今無渡河及時山
果熟隨意野蔬多莫畏前溪暝煙中有綠蓑

亂定出山晚歸有作

爲戀嵩陽寺遲遲到郭門北山新有檄南國舊招魂孤鳥投
殘照歸雲擁暮村漁樵皆絕迹兵甲畏黃昏

落日

關河百戰後落日迴含愁古戍人煙斷空山草木秋生涯傷
米價國稅及漁舟野哭何時息諸軍正逗遛

憶昔

輪臺下詔悔從前哀痛中原戰鬪年博士尙陳鹽鐵論上方
時減水衡錢新亭一夕悲禾黍故國三春泣杜鵑回首興亡
成俯仰廣陵城北斷炊煙

送筓澤之大梁應聘

一樽祖道唱騷歌驢耳批風指汴河海嶠白雲親舍遠天涯

紫氣舊京多逢人是處心堪寫揖客從來禮不苟若過夷門
應悵望大梁公子近如何

過吳小髯新居

槐影初斜聽午雞呼兒翦韭婦蒸藜故人治具留花下高士
移家近竹西肯使姓名通狗監可聞比舍有牛醫藥欄莫怪
頻相過坐惜春光入鼓鼙

季良眉

一首

良眉字子常泰興布衣有北村詩鈔

感興

萬物悲秋氣漪塘日半斜孤清憐浴鷺疏放對溪花鬼火青
依草漁舟白近沙閒愁輕易起觸目已成嗟

楊麓一首

麓字戶雲南通州人諸生有竹柳堂西林社自怡等

集

一經堂詩話戶雲與里中范十山孫皆山胡麟兮結社山茨其詩鉤棘索隱沾染鍾譚習氣其流利清越者如水亭云客意方獨成流鶯乃相顧閒居云有情夜月邀詩友無那春風戀酒人集中佳句也

薄暮歸舟抵塔山乘興登眺

嵐氣暮未落攜筇上遠岑潮來山欲去天盡水多深對月發吟興因風揚梵音征塗吾倦役久動故鄉心

孫模二首

模字楷人南通州人諸生有悲煙草

于一水亭

年來歧路歎紛紛
偶問風塵一識君
沙漠誰人悲雁字
邗江有客乞鵝羣
相逢旅嶺皆秋色
對酒鄉心隔楚雲
我亦攜琴訪同調
一泓流水靜中分

酒醒夜起

重剔銀缸暗起看
北斗斜斜驚清影
併殘月在梅花

明詩紀事

貴陽陳田輯

李標

李標一首

標字子建嘉善人自號東山遺民有東山遺稿

靜志居詩話子建精於戎機戰畧王通諸書史閣部
道鄰辟爲記室事不可爲返里與魏吉士子一深契
吉士公車北上執手河干謂子建曰子夢斜塘見茫
茫一片土無復雞犬桑麻行後得無有變乎子建戲
曰君且富貴宜目中無人耳甲申吉士喪車北還經
斜塘子建撫棺曰子一子一果妖夢是踐耶慟哭失
聲繼聞史公殉節揚州渡江會葬其衣冠於梅花嶺
歸而繞屋皆種梅賦詩三十首蓋託於西壺慟哭之
謝參軍云

病起園梅已殘有感

病裏看梅也療饑春光依舊帶圍非有情花片無情雨攪起
春愁歷亂飛

葉珍一首

珍字重君嘉善人諸生有潛夫集

魏塘詩陳重君應大司馬張公國維辟爲記室倚馬
草檄讀者汗浹髮監已杖策入閩嶠歷東粵聞父喪
跣足還歸旣葬復憫憫出門瞻河登岱感物愴懷
寄之詩歸里棄故廬別構茅屋數椽壘土成阜曰累
山黃冠布衲花衲著書以終

體上人開講鐵佛寺賦贈

攜杖湖山側相看白髮新烽煙存古寺冰雪見完人交遠情
偏密機空語自眞虎溪何必遠撫掌悟前因

孫纘祖二首

續祖字昭令嘉善人諸生有隆畧堂詩二卷

和顧偉南九日

令節當風雨繁雲鬱未開淩秋一雁過落木萬山哀短髮還
扶帽長歌數舉杯東籬泛菊者應望白衣來

傷春

舊苑荒荒長綠蒲衣冠無復想雄圖孝陵紫氣春蕭索少海
前星事有無帝子夢寒春草碧野人愁絕海雲孤可憐此日
空翹首援鳥遙天淚欲枯

蔣國榮一首

國榮字功夏嘉善人

棹歸榮川

蟣虱江海寇青鬚阻去槎坐悲寒食雨吟望古魚沙改徧新
林火凋殘舊塚花淒淒櫻筍餉誰過野人家

蔣平階 一首

平階初名斐階字馭閔一字大鴻華亭人僑寓嘉善
有集

黃觀只述就獄始末爲誌悲感

何事輜車客棲遲感歲華范滂甯就吏張儉竟還家二月秦
淮柳三秋句曲花園扉真不惡慰爾莫長嗟

計孺 一首

孺字元孺一字古民常熟人僑寓嘉善

魏塘詩陳元孺工詩清真酒酒晚唐中之清弱者

移居

北山曾竊吹南郭且潛身松菊本無主雲泉任卜鄰著書強
自喜乞食肯言貧便是柴桑里深居數夕晨

黃輔 一首

輔字弃公如皋人諸生有恕菴詩稿四卷

移竹

幽居愛結水雲傍曲徑方塘卉木香添得琅玕三十箇一庭
秋色似瀟湘

叢一蘭 一首

一蘭字栖枳如皋市衣

東逸上人索茶

庭槐風雨午泠泠一枕羲皇夢自醒
莫道書生無箇事焚香拂几著茶經

范廷瓚一首

廷瓚字獻重如皋人諸生有吳吟竹西咏漚莊集

玉鈎斜

吳公臺下墳玉貌化爲土誰慰六朝魂
悲風作寒雨

馬鑾二首

鑾字伯和貴陽人

田按伯和馬士英子華亭顧在觀爲楊龍友所引入
士英幕嘗言阮大絨不可用大絨欲起鈞黨之獄在
觀說伯和泣諫賴以稍止是亦能幹藉首也國亡後
垂簾金陵賣卜以死士英又有子名錫爲禁軍提督
大兵渡江梟其首於市見廣陽雜記

追和亡友鮑曼殊見贈

贈言能幾日君已倦人間到死事方畢有生誰得聞夜臺仍
貰酒遺草欲藏山幽感元無隔招魂自可刪

聞蛩

秋夜已淒清空階爾復鳴故催砧響亂如與客愁爭酒淺夢
難續家貧心易驚燈前兒女笑同聽各爲情

吳道約 一首

道約字博之一字亞侯桐城人諸生有大安山房集

秦淮雜詠

油壁車前納晚風單衫杏子溼微紅何當素手攀珠箔秋水
橫波一笑中

楊焯二首

焯字俊三吳人僑寓金陵

秣陵雜詠二首

城南臨眺處傳爲雨花臺野曠層陰合山空積翠開吳雲連
海動朔雁暗江來坐覺煙霽外風聲戰角哀

正學祠邊路沈吟木末亭雨飛垂薜荔臺古落丹青夜火歸
遊騎寒城沒曉星蒼蒼空霧裏應見哭青冥

黃世康一首

世康字元幹莆田布衣

蘭陔詩話元幹負不羈之才壯遊四方嘗出山海關
周覽形勢察沙場堡塞屯牧戰守之宜渡遼水入燕
將上書言邊事時士大夫諱言兵咸以爲狂無所遇
而歸後客顧小侯所建家爲草廬襄格平繼露布援

筆立就辭義瑣璋所建大喜酬以金百斤縑十疋元
幹分贈貧交立盡

重陽前一日從家給諫茶讌同吳元翰韻

蕭颯寒氣肅登高孰擬賦蠟屐遲明朝瓊筵啟茲暮石泉響
試茶庭菊香墜露昔聞林下風今見塵外度志以澹泊明道
以寒默悟顧往淪芳途撫茲愜幽趣雲影流方塘風聲寂高
樹

周盡卿一首

盡卿字爾修莆田人國子監生有章林岩閣草

春日雜興

翹首看黃鵠高飛不可攀幽心依白社託興在青山草閣溪
聲細松門鶴夢閒微吟向林薄妨損石苔斑

林璟 一首

璟字台正莆田人諸生有簡園詩集

蘭陵詩話台正同遊諸君皆感楚吟獨能不墮時趨取材於漢魏六朝亦磊落之士也

門有車馬客

門有車馬客車馬何軒軒問是故鄉人披衣不及殮延客登
我堂稍稍敘寒溫客心乃自悲對我淚傾盆云當出門時辛
苦猶宵奔故族已凋喪親戚無一存巍巍舊第宅蓬蒿翳其
門昔時歌舞地今日吟清猿君家有邱隴狐兔遊其原還憶
平生親跡往惟孤魂聽此未及終氣促聲已吞勸客飲此酒
感慨涕盈樽

方沂 一首

沂字宏祐江甯人有天隨堂集且漁集

金陵詩徵宏祐自號江上野漁結茅江上得魚輒以易酒醉則高吟與僧克明巨顙削石岡瞻與周等倡和皆隱於方外

魯兩生

繼聖如有作百年始勝殘漢初承秦敝禮壞樂不完卓哉魯兩生欲以賈君難奈何叔孫通因陋成苟安遂令一代制王霸雜申韓堯禹治天下澄源在其端土階三尺餘豈直奉崇觀

王之梁 一首

之梁字雲岷嘉興人僑寓金陵有讀史廬稿

金陵詩徵雲岷使劍遠遊福王南渡慨然上書陳策爲馬阮所忌幾被害南都失守遂頽然自放生平好

結客每過豪士攜酒對大江痛飲嘉興周質憫其流
離以詩招之歸云咫尺傳烽隔往還故園流水自潺
湲寒煙豈限重湖雨春樹能深二月山結客徒然開
竹徑遊人應復開柴關他鄉縱有憐君者何似歸來
十畝間雲岫竟不歸伴狂以終

蘇臺頌

蘇臺高高不極臺高望見臺兵入當時吳漢爭江汜虎關龍
爭勢未已徧師一旅控臺城更出一軍援唇齒批亢搗虛斷
中堅左支右梧應莫抵天下事未可知何爲乎飲河之鷄怡
堂之雀徒然守此彈丸之黑子堪憐跼蹐無良策但取蘇臺
作京國旣無島中五百人空結臺下三千客雞坡狗塘競吳
子狗盜雞鳴無一士祇有田橫倔強心昂首漢皇呼我爾檻
車肯乞隆準憐怨魂夜哭龍江水噫吁嘻蘇臺高高已夷吳

民猶問張王基

覃獻錄 一首

獻繇字公烈荊州人明末官中書國亡後走日本還

羅晚居鍾山

東粵舟中與故人話舊

離亂移家西復東故人相見已成翁
旅窗記別十年外前夕
論心三月中按劍風塵驚老大聚沙庭院與兒童
蹉跎莫話文章事聲價於今總不同

鄧右符 一首

右符字台卿南豐人有龍城隱集

遊崇覺寺有感曾文定公墓

駐馬寒塘聽晚鐘平安竹下走青童松杉異代秋風裏
荒碑落照中客爲白雲添悵望禪從黃葉悟眞空斯文今日
誰爲主莽莽寒山感慨同

黃文星 一首

文星字子威南昌人僑寓孝感貢生有望楚堂集

春湖曉釣

半湖春雨一蓑煙盡日蕭蕭漾碧天隔岸桃花茅屋底斷無
人處有漁船

璩一麟 二首

一麟字逸仲建昌新城人諸生

同涂山公夜渡江門

看山不覺晚乘月到江門野寺橋邊路漁家竹裏村長林通
古渡遠燒隔寒原獨夜偕君去幽懷未可言

溪上

小徑入松林寒流爭斷岸漁歌送響來時與溪聲亂

盧傳來

一首

傳來字復郎一字念聲甯鄉人崇禎貢生

高歌

孤憤誰堪語高歌自寫哀世人幾欲殺吾黨亦相猜短髮秋
霜點寒衣薜荔裁坐看三徑裏晚菊傲霜開

李振聲

一首

振聲字元公東陽人有石艇子詩

金華詩錄振聲自號石艇子勝國遺民自題墓石守志以終

草堂

築石面郊垌清光滿戶庭水方巖瀨碧山學瀟陵青我意懷肥遯人情忌獨醒夜窗松月白坐獨楚騷經

戴于庭一首

于庭字子薦金華人貢生官沙縣教諭

閒居

解帶有餘閒玩此一拳石讀罷黃庭經松蔭墮秋碧

駱雲程二首

雲程字天游一名雨禾字穉孫嘉興人有素勞堂集

魏塘詩陳天游饒瞻畧知兵事中丞岳和聲出鎮榆林延掌書記時乘駿馬走塞上與宿將賈酒悲歌縱

觀亭障詢各邊形勢凡扼塞要害如指諸掌年九十
餘談及馬阮輒髮植齒擊以不能奮臂其間爲恨嘗
與蔣之勰選樵李詩乘未及梓

送弘與上人採茶埭山

飛錫躡芙蓉穿蘿摘紫茸香煩三等判色借一谿濃雪乳擎
甌泛雲芽裏簪封師還結湯社參破趙州宗

暮春

愁中忘却春歸去綠暗薜蘿燕子飛還憶月明攜手處半庭
花影上人衣

張玉成一首

玉成字成倩如皋人諸生

田按成倩輯七言律準四十七卷自敘云樂有準六
律之節以達詩有準五十六言之法以昭度有準萬

器之情以得得準之義可以言詩成情所著不多見
未知於準之義果何如也

雪中懷昌伯麀王翰卿

萬木蕭條入暮煙續紛飛雪壓籬邊爲慚仲蔚平陵宅翻憶
王猷剡水船歲事淒涼愁共劇風塵搖落病相憐那堪更滯
三閩地讀罷招魂思惘然

朱文心一首

文心字珮龍南通州人貢生有惺園集

金陵江口夜泊

孤舟江上泊秋夢耿難成片月中流影千帆半夜聲地鄰桃
葉渡山近石頭城倚舵聞吳詠偏令旅思生

吳爲霖一首

爲霖字景傳無錫人有白賁集

客自澄江歸有贈

淨遠堂前路微風穩放舟江昏茶磨雨煙暝鴛臺秋入饌花
雞肥開樽綠蟻浮西塘十八里來往候潮頭

明詩紀事

貴陽陳田輯

辛籤

潘陸二首

陸字江如吳江人僑居鎮江有穆溪集

明詩綜魏楚白云江如四壁蕭然而北海之座常滿其論詩慷慨謂鍾譚興而國亡是亦法家定案

生米鎮

古鎮風帆落天涯倦客回白雲生鵠嶺真氣挹蛟臺瘴海軍
書警殘黎野哭哀青青霜岸樹記取豫章材

劍津

城下三溪合當時七較齊曾聞朱鷺出復見杜鵑啼碧草年

頻換蒼梧路總迷向來消息斷淚盡浙江西

湯燕生 三首

燕生字玄翼一字巖夫甯國太平人有商歌集

新治荆思舊錄巖夫自太平遷蕪湖所居地甚僻屋兩楹內外皆農具恬然一農人也恆苦人過訪人亦罕有造者詩皆唐音篆書古淡入妙不在伯奇子行下

赭山二首

赤鑄山頭鳥不飛上皇曾此易青衣無多侍從爭投甲有限
生靈但掩扉五國城西邊月苦景陽樓下暮鐘微傷心莫唱
淋鈴曲未得生從蜀道歸

淚逐天風向北揮山僧指點舊重圍輒車東駐泉偏咽代馬
南來草不肥野老久知今日事先臣猶護昔年非延秋門外

王孫盡司馬元戎自錦衣

梅村詩話玄翼蕭山懷古二首於乙酉五月事極切
哀婉淒涼使人不忍卒讀武塘夏雪子極稱之

訪漸江大師剎園

松響山堂水自波晚知清淨寄雲柯橫流江海寧舟去失路
煙霞引杖過獨歎蘭亭離玉匣深悲書院記宣和藥欄秋興
閒今古留客聽泉蔓草坡

范路

七首

路一名澱字貞甫蘭谿人流寓嘉興私諡貞簡先生

有靈蘭館集

明詩綜周青士云澱甫潛心性命之學不關佛氏偶
然作云青青江岸山沾沾江流水夫豈不高深有象
終必毀又云我肯安分坐即天見北斗風吹百草頭
月出萬山口牧雲如海愛之欲付以巾拂不受海鹽

感懷

張處士瑁白方請學硤石山遵甫謂其晰明德格物
意有未安別為講義其學省人或以其未盡合乎朱
子非之遵甫不顧也其詩不費鍛鍊而出誦之妍雅
和平晚開蘊蘭館賈藥長冰市乍愚乍智人莫測其
所詣云
靜志居詩話道甫合與腹信博通古今賣藥市門行
歌帶索由其見深故於憂淺識遠斯視患淫昔人謂
太邱道廣廣則不周傳來性峻峻則少納遵甫廣不
混俗峻不污物發為詩文多見道之言裴子野之稱
劉居士也所修孔氏之學則備者師之所明釋氏之
教則淨行傳之所著文集則詞人錄之斯言也遵甫
庶足當之矣
許燦晦堂詩話遵甫愚君貧等黔婁和同柳下學作
茂叔節類伯鸞常歲除大雪王布衣介人使人伺之
方懸破席蔽風夫婦啜糠守歲遺以米五升不受族
弟思攜妻子鬻身求活留之同飯糠粒不以為嫌遵
亂流離海上志不少挫遂於理學多從方外游不為
所惑嘗曰釋氏之學一了即為百了吾儒之學百了
方為一了其詩旨意懇惻精光炯然
田汝遵甫彌節既高吐屬自遠埃壘

夜定燈燼落孤生遙遙想應物鮮所愜心形逝成兩蕙草日
以摧榛莽日以長風雲道何窮羽翮悲失養擾擾泥塗中誰
能事鞅掌

久雨

我心正悽惻淫雨在此時累旬不見天局踳無所之沿苔上
危墻中庭竟成池萍藻忽已生青青向檐楣鳴蛙從何來公
然在床帷但得天氣晴東郊望耘耔

夜坐懷唐上玉繆天自林邱聯句

獨坐燦清榮華光照纖悉端江旣云歛四壁起蕭瑟孤情渺
難控良契隔遐室慧吟殊未忘醒靈迺奔軼芳軌信所希佳
辰逝何疾良哉古人言寸陰抵兼鑑

辛酉卷三十一
三
自傷

上有紅桃花下有碧流水一朝風相吹桃花忽相委墜我飄泊人所傷亦如此

晚步

氣侵林木晚歸步自原田舊業愁中盡餘生亂後全人煙孤壘斷衰草夕陽連何處悲笳動依然似去年

一邱山院得主人吳君佐夜邀從山塗暗行二十里

山院黃昏政寂寥感君仗劍獨相邀荒煙暗盡來時路漁火明隨去後潮林下時時逢石虎樹頭隱隱出山魃柴門冥漠知何處約畧曾過舊竹橋

遙經郡城作

愁雲黑霧壓城頭
丁令重來隔幾秋
折戟尚沈沙底鐵
殘陽空照水邊樓
風吹牧馬千羣出
浪打寒塘百道流
未到新亭腸已絕
何須極目望神州

湯渡二首

渡字聖弘吳人有香草堂遺稿

清涼山

風景故依依
孤亭出翠微
雨中同客至
月上望僧歸
山合衆樵響
風高一雁飛
胭脂井尚在
冷碧蝕苔衣

懷顧甯人

虎頭應復讓君痴
儒俠僧樵事事宜
千百國風存野記
十三陵樹補新詩
音聲小悟殊堪喜
姓字頻更莫浪疑
懷友句成

反自愧半函煙雨隔秋思

陳確一首

確初名道永字乾初海甯人

訪蔡來老

東海尋高隱
悠然屢空餘
衰年千里客
茅屋一床書
傲骨支天地
清風動里閭
日斜攜手出
恰是晚潮初

吳時德三首

時德字明之一字不官以人有蘆中草

湖山靈秀集不官苦心學詩清汎孤起不隨時人徵逐

田按不官曾與錢宗伯倡和錄其詩入吾炙集

暮春述懷呈顧與治

江城孤客若爲鄰相對黃花卽故人
仗酒撥愁餅易罄開編
臨牖月常親好閒未遂翻爲病得句能工始愛貧
漂泊異鄉還自幸十年猶剩亂離身

過張文寺隱居

苔逕逡巡破翠痕蕭然南郭似荒村
滿畦野菜初生葉近水
垂楊半露根著述可消閒歲月香光偏到小柴門
幽棲自是吾儕事秦後桃花且莫論

答林茂之問予山中近況

日日蕭閒閉草廬莫將蹤迹問樵漁
山中自是無他供一樹
梅花一卷書

張光啟一首

光啟字元明章邱諸生

居易錄元明世居白雲湖上少爲諸生有名爲梅長公朱未孩二公所知崇禎庚辰年四十棄諸生歸圃種樹藝花自樂亂後足不履城市年八十餘卒有張仲子詩往往可傳

對菊

種菊護護傍石根凌晨坐臥近黃昏沽來新釀經秋醉開盡

寒花未出門

張致中一首

致中字性符淮安山陽人以經明行修舉未授官卒

其友私謚恭孝先生有眉尹文集

靜志居詩話復社初興君與白受藻素先方能楷選若率同郡諸子應之而君爲之領袖以尊經博古是尙家雖貧儲藏鼎彝碑板之文頗富有子昭字力臣棄諸生不試工六書

感懷

虎猛亦可搏龍神亦可馴問哉不可下無如壯士心揚之秋
雲高抑之秋洲沈哀樂詎有定感物成斷斷世路塞冠蓋得
意驕黃金未逢尼父嘆安知爲麒麟

陸啟法一首

啟法字叔度平湖人貢生有賁趾山房集

橋李詩繫叔度博極經史不事章句倜儻負奇通輕
俠類河朔壯士好談論古今成敗知邊塞事扣之纒
纒不可窮嘗遊建業命酒泛舟召舊院名姬大會詞
人於秦淮酒半一姬倚檻微嘆曰惜無兩岸紅葉佐
此勝集明日復讌比客至則晚風拂席荷香襲人舉
座莫測其故蓋於是夕懸金購數百盆荷碎而沈之
自是十四樓中皆目爲樊川復出後走京師垂二十
年不遇歸而貧甚值喪亂更名遜字山翁與酒人奇
士邂逅短歌歎歎聲淚俱下及沒趙退之以文祭之
日總君一身頓殊今昔翻翻五陵蕭蕭四壁金散名

成人完代革

次酬黃平立喜余遠歸

易水悲歌萬里風五湖煙雨一舟中
長安大道驅流馬古戍寒秋斷晚鴻
醉酒漫勞王處仲抱琴不學李元忠
移文正恐君先我十載徒然草送窮

張杉二首

杉字南士蕭山人有集

毛奇齡西河集康熙二年海上大獄起歸安魏耕走
蕭山復走梅市大將軍刊章遮捕之獲耕兼逮蕭山
梅市之藏耕者以銀鑄鑲李達楊遷并祁忠敬公次
于班孫家人莫敢問道賂離立南士挺身走三家爲
經紀其事及耕伏法班孫與達與遷並徙塞外點解
多一人則南士也解官斥之日汝欲偕往耶南士曰
當魏耕逃時亦思至某家徒以舟楫未便故幸免今
不忍三人者獨行欲送之過河而執事以爲欲偕往

吾豈畏往者耶解官義之勸之返乃驟眺華衣而別
靜志居詩話南士周見洽聞賦才獨步詩篇和雅無
傲志之音

九日

江楓吹葉滿江皋湛湛江流雁正疏
病起孤懷愁望遠節逢九日罷登高
茱萸香憶仙人佩白苣寒生處士袍
手攬黃花還強酒壯心倚醉轉蕭騷

蒲坂道中作

峻坂長驅匹馬過春風吹客奈愁何
重華不返蒼梧鶴孤竹空傳採薇歌
北望雲中連紫塞西來天上瀉黃河
幽懷故國歸何處此日征衣淚更多

史玄六首

立字弱翁吳江人有弱翁詩文集

徐崧百城煙水北林在吳江縣北門外俗名新浜崇禎間史立隱居之地立所著有詩集文集河行注疏東倡和集鹽法志吳江耆舊傳梅西雜志舊京遺事

中秋攜新姬今宵出都

俄然出樊籠再遊江海天瀟瀟白露秋我行已三年京華貴
東溼龍沙事烽煙黃金養末士此輩無高賢怪汝蘭蕙姿識
我思歸田相從願同行梳頭鞍馬前我家住江南采菱復采
蓮自從遠行役湖渚空潺湲今日果何如與汝相周旋大婦
織流黃小婦隨機邊三日下兩絹匹匹絲纏綿其中我讀書
文史聲相宣陰陽事殊川教化達以專念此洽幽趣豈計甌
空錢收車我馬行明珠雙炤懸

本事詩崇禎時弱翁在都門娶燕姬明慧善曲字曰
今宵德州盧侍御世濯賦傾城悅名世詩贈之一時
和者甚眾乙酉後弱翁沒于西滌姬亦嫁爲廝養婦
矣

秋霽題北林敝廬

郊墅秋陰後平橋路未通
寒林經晚翠早稻出香紅
歲祲依殘帙年侵魄轉蓬
雙峰門外對野興似村翁

春感

秀色江城舊今來瓦礫平
春風吹綠浦芳草不能生
甲第青蘿遶空林黃鳥鳴
若逢明月夜橫笛作邊聲

庚辰冬同松之文將筆文虎邱訪道開屬公

步屨尋開士探幽及小春
琴鳴流水靜花放衲衣新
黃葉千年樹青山半醉人
還家無底事蘭棹且逡巡

祇園寺

絕壑長林古寺開
石門殘日滿蒼苔
嵐光雲影千尋落
帆色湖陰萬里來
池上白蓮堪結社
院邊叢竹且銜杯
不緣病減登山力
待月遙從縹緲回

當塗縣

晚泊當塗縣
青山在縣門
仙人今亡去
愁殺謝家村

趙渙
一首

灊宇少文吳江人

田拔少文與吳日生
史弱翁倡和號東湖三子

楊龍友

夫子天南秀
文星動夜郎
摛詞飛赤電
拂劍倚青霜
鸞羽雕

荆棘龍韜傳玉璫羣公正推轂伫望播殘疆

顧有孝一首

有孝字茂倫吳江人諸生有雪灘釣叟集

徐鉉南州草堂集茂倫爲詩每矜慎不苟作遇有分
題擊鉢者恆終日不成一字而間出片言必雋永頌
其座人吾邑白啟禎以後如周安期徐介白俞無殊
張九臨朱長孺暨茂倫皆所謂前朝之遺老盛世之
逸民也
靜志居詩話處士甄綜百家之詩開雕分授盛行於
時賓至輒留江左有齋菜孟嘗君之目由其胸無柴
棘故月旦同辭晚自稱雪灘釣叟松陵女子沈關關
刺繡作雪灘濯足圖一經裝池過江人士以不與題
辭爲恨

寄贈沈留侯偕小阮北上

春風楊柳拂行舟有美聯翩共遠游入洛陸機新作賦依劉
王粲故多愁舊京朱履三千士荒塚冬青一十秋湖上好山

無恙在獨持卮酒對羣鷗

周安一首

安字安節吳江人有草閣集

願有孝雪難釣叟集安節洎懷幽詣躡武宗雷清音琅琅不滅魚山仙梵

月夜懷此山禪師兼寄張文通

憶昨投蓮社相攜出虎溪雲山忽間阻月落雪川西露下花
逾白松高鶴共棲還驚臨照內江海有征蹄

雷士俊四首

士俊字伯籲涇陽人諸生僑居江都有艾陵詩鈔

揚州府志士俊棄諸生專力經史百家熟悉古今治亂得失之政辨別君子小人消長退之幾爲文鉅心則月既脫稿必琢磨再四始出以示人貧老負氣悲憤得疾以卒

田按伯顓詩古直老蒼有唐人格調時攀魏晉此秦
風之壯激者

送河間司理李杞瞻赴任

去歲纔識面君尋作南遊至此無幾日一官之瀛州憶昔論
文飲客舍成厭酌門外車馬喧君行不可留築夫吾老友嘯
傲臥山邱今又隨君往索居誰與傳蕭條北風厲冰雪滿道
周握手難爲別濁醪盡更籌河間近京畿動輒罹愆尤虎狼
恣窺噬彷徨使人愁何以垂令名勞民庶小休誦彼小宛詩
懷古悵悠悠

送王幼華歸秦

故人西歸去五月天方熱中途多險艱單車向滹嶧火雲照
烈日遊子正飢渴庭樹綠陰濃執手難爲別近詩推秦風高

古比駟鐵我友有新篇字字皆白雪

春日詠懷二首

青青道旁柳潺潺潤中水柳枯春復榮水逝來如駛人生百年間一死無活理伫立臨岐路悠然念君子焉能乘雲翔阻絕動盈咫登高望邱墓前後長荆杞聖愚固皆然鮮民悲天圯孤鳥蹲寒樹向夕鳴不已

步登蜀岡上遙望廣陵城獨立衣縹緲颯酒起風聲大道何盤盤匹馬自孤征荒徑埋瓦礫山寺空崢嶸日光乍有無白雲樹杪生回首睇吾廬兩眼淚縱橫

李沂 四首

沂字子化一字艾山號壺菴揚州興化人諸生有鸞

嘯堂集

靜志居詩話啟禎間詩家多惑於竟陵流派中州張
軾客暨弟見客避寇僑居昭陽每於賓坐論詩有左
祖竟陵者至張目批其煩是時艾山特欣然相接故
昭陽詩派不墮姦聲皆艾山導之也
田拔子化詩清真絕俗晚好學仙蓋有託而逃也

玉壺吟

予夜夢一男子持扇見示題曰玉壺澄澈冷貯木色
覺而爲此吟也

堯之聖兮舜爲禪皇紀張兮定八極八極定兮二曜光端予
軌兮由周行由周行兮靈之綬遵無爲兮樂安居道之喪兮
繩墨旣多紛總總兮王化訛流之濁兮源弗清法令章兮亂
日生亂日生兮巨盜起攘神器兮劫天子海水淘兮山之椒

天闕其日兮民爲妖民爲妖兮心爲鬼絕陽光兮壽生理淬
予劍兮張予弓貫魍魎兮磔三彭三彭磔兮六合清驂兩龍
兮遊赤城幹元化兮組虛無返予初兮歸玉壺

刈薪歌

今年水大薪難取蘆花水面蘆水底尺五鎌刀丈二柄竟日
一人十束止辛勤餬口豈能長尙憂妻子飢凍死黑雲滿天
烏亂飛屋西望船船未歸

聽楊懷玉彈琴歌

楊君善彈思皇操自言崇禎末年作強之再三始肯放拂絃
沈吟淚先落引商振角時扣宮八荒蕭械回悲風天地惡慘
白日凍啾啾鬼哭空庭中絃鳴指咽絕復生黍離麥秀傷人

情感時述事語不明四座慷慨誰能平楊君本是西蜀豪幼
精馬槊兼弓刀三巴健兒好顏色立功好著國花袍是年天
子郊宮蒼還宮三嘆古樂亡爰命廷臣定樂章侍臣間詔俱
徬徨或騰楊君通律呂徑來天上調宮商便殿侍坐近玉牀
賜食得比中書堂鼉鰐蛟躍乾坤改垂老飄飄適東海千金
藥散無餘惟有先皇賜琴在陽山客舍長莓苔重門小苑
碧桃開靜簡道書春寂歷細熟柏子雲徘徊滄浪之水何清
清波底墜雪白鷺明布帽青鞵又西去日暮相思空復情

田按楊懷玉事詳見李確詩後

避亂舟中作

避地家何處飄然更出門艱難攜十口風雨向孤村遠浦殘

荷立寒沙急浪吞偷生在飄泊時事不堪論

王廷璧一首

廷璧字雙白武進人

聞雁

雁聲何處至明月照西樓寂寞青楓樹蒼茫白露洲雲中呼
侶去天外入邊愁我亦窮途客悽然驚暮秋

談允謙四首

允謙字長益丹徒人有樹護草堂集

靜志居詩話崇禎初大官庖開應支物價簿帝詰內
侍謂太浮且曰災鷺臙臙肉醉在某肆市之錢半百
耳內侍驚愕錄長益聞內臣述往事詩云潛邸曾親
到市廛民問物價每留連西華驚寓前門鮮一箸纔
消半百錢足以徵思陵留心民事之一端也

臨江柑園

臨晚蕭灘上柑園向水開
黃從入霜後香自過江來
日望湘雲至今疑破雨
同徘徊不能去誰識楚臣哀

東湖

南浦積雲何日起
西山積雨未能晴
春波近已浸城半秋水
年來與路平
下楊有誰留
孺子樹蔬無地訪
雲卿歌樓燒盡
多新鬼
夜靜猶聞絃管聲

滕王閣故址

高閣臨流付劫灰
重游難問舊歌臺
鋤蘭日見佳人去
芳草何年帝子回
南浦鷺鷥隨浪沒
西山風雨過城來
多情今夜章江水
吹盡殘雲月又開

邊關春晚曲

胡姬隊隊弄胡琴
酒滴醺酥取次斟
花柳旣無鶯燕少
總然春去不關心

蔣人一首

人字公凡一字昭遺嘉興人

梅里詩輯布衣泉石盟心潛蹤村僻自署桃花里人

歲除前五日送金子還白下

衰柳不堪折寒梅聊贈行
春風知幾日還到石頭城

王巖二首

巖字築夫寶應人有異書集白田布衣集

靜志居詩話築夫時力爲古文辭要以酷樸勝若惟
恐其文之工者頗有類於穆伯長柳仲塗尹師魯石

守道諸家賦詩不多原本杜曲

孫無言之虎墩贈別

又欲歸何處飄零問海涯山前多虎迹世外有人家
曠野悲風動孤舟落日斜誰能臨積水容易臥煙霞

尋春

尋春在何處惆悵落花前淮海仍寒食江山老杜鵑
全生惟縱飲養拙只高眠日落飛飛燕歸巢意可憐

孫爽一首

爽字子度崇德人有甲申以前詩容菴集

秋懷

疏寮映山帶竹籬怒泉落巒氣集松杉漸知林影薄殘英泥

輕寒側側護羅幕結志獨徬徨發憤以著作愴悼雅云厚冥
觀還自樂

蔡仲光 三首

仲光字大敬蕭山人

采蓴

鱸魚膾水鄉雒客動歸腸一夜秋風起滿湖蓴菜香布帆飛
裊裊花嶼鬱蒼蒼小摘隨人意幽棲好不忘

飛星

薄暮愁相向西風人迹稀天星大如椀冉冉渡江飛海水秋
聽壯吳山夕望微十年戎馬地回首一霑衣

題姜廷幹畫

巖高秋氣深臨岸幾茅屋此徑鮮人行何由知路曲

錢肅澗

四首

肅澗字季沐一字礎日無錫人諸生有文激十峯等

集

感舊集震滄云礎日明諸生甲申後棄去縣令以事夾其足脛至折礎日笑云夔一足庸何傷遂爲跛足生自號東林遺老

采蓮曲

采蓮女雙槳逢江嶺吳姬越豔誇眉嫵兩地新妝一色裁玉
釵羅袖嫋嫋來荷花欲語卻不語誰人解語爭徘徊爭徘徊
弄舟搖碧水水中驚起雙鴛鴦作浪迴風飛不止

過平原懷平原君

人生莫結客結客須及干與百千人百人縱美好亦有瘡
與跛躄自來傾士推田文滿堂食客何紛紛同時肝膽更誰
向共說應向平原君此行正在平原里卻憐未見佳公子衣
冠零落野草中土田委棄荒煙裏齊之封疆趙食邑昔年結
客如雲集當今躄者是何人公子在焉呼或出

客從冀東來述陳言夏近況賦詩嘆之

販樵鬻鹽出江邊十里桃花五里煙唐市湖林常一過兒童
爭道孝廉船

過汨羅追和韓昌黎

湖水遙通江水波南流爲汨北爲羅舟行不識懷沙處相向
何方唱九歌

丁之賢 三首

之賢字德舉漳浦人

何梅綬安二布衣詩明崇禎中流寇起西北德舉挾
策入都門客南司空邸第欲獻書闕下言兵事會司
空罷官歸秦中挾德舉與俱書不果上德舉請司空
厚為資裝實十日糧短衣疋馬循賀蘭山出長城訪
求古戰陣營壘日與朔方豪傑盡沙聚米為擣賊巢
計謀甫合而李自成陷西安破潼關明社遂亡德舉
念家有老母脫身南下有王將軍者建牙汀州聞德
舉名招致幕下贈以一婢小字海蠻未幾王將軍別
調去德舉偕海蠻歸窮老無所聊賴就屋城東桃花
溪上客至樵蘇不寒情談而已子猶及見其白髮髮
鬢垂額上楮冠布袍蹙蹙市廛中沒之口邑令秋浦
檀光熾為之書其碑曰詩人丁布衣之墓德舉在秦
時所刻詩止百餘首里居家貧不能具紙筆所為詩
多草書歷日背上字漫漶不可識認子以意釋之統
為鈔撮含朱布衣詩刻之為級安兩布衣集
榕城詩話之賢詩五言若林豁秋摧葉江墮夜聚航
平沙含月迴遠火雜星明河流當晉曲山勢出秦平
七言若潼關東抱成金陡霸水西來作御溝皆清峭

刻露

淮安署中和別李以理司理

戀戀情明發其如游子何
天涯纔挂席海內尙橫戈
江轉鄉思近春歸別恨多
懸知孤館夢帶月繞淮河

夏夜許墅關送張鍾石歸燕沈季聯歸越

越國南連海幽州北到天
挂帆梅雨過驅馬火雲懸
戀別還謀夜相逢未卜年
卻教羈雁羨俱向故鄉旋

留郎曲

向曉候天色江雲罩日紅
囑郎休解纜亭午石尤風

朱國漢

七首

國漢字爲章漳浦人

榕城詩話朱爲章晚號獨醒居士少孤事母以孝聞
崇禎甲申變聞狂走登故越王臺址北向號慟累日
夜不休悉焚棄其素業託於賈人以自晦歷吳越涉
荆豫往來燕趙齊魯郊與僮僕備僧共甘苦所至遇
古忠臣名賢祠廟墟墓拂石泉摘山花俯伏拜奠歌
詩憑弔有騷人之遺意五言若烽火夷陵道冰霜息
壤城綠蒲畚客飯紅葉女郎樵鋤芝沿鹿去拾橡伴
狙歸無情漳水清何極垂死奸雄意可憐烟霞滅沒
三山外江海蒼茫一氣中皆極鍛鍊
田按綬安二布衣爲章爲勝

感懷雜詩

生嫌雞蟲爭死信鳶蟻食鳶蟻何親疏雞蟲互失得乾餱成
窻尤耨鋤有德色鼎鼎百年內偈欠復偈欠買山山不深擇
林林可卽側身望冥冥羨彼飛鴻翼

旅宿杭川

唧唧復唧唧床頭蟋蟀吟關山孤枕夢滿壑百年心不雨暮

寒薄微霜秋氣深更聞明月下力盡擣衣砧

丙辰楚中旅懷

故國飛鴻絕關河仗劍行秋風吹塞馬殺氣凜嚴城嶺徼猶
擐甲衡湘未洗兵紛紛傳卜式已拜漢公卿

獅子菴茶話

疏鐘散林樾秋意滿禪關龍象諸天幻茶瓜半日閒生天須
是慧作佛不妨頑坐久涼飈起歸禽自往還

吳城登望湖亭

金鏡回首夕陽邊客裏年光感逝川千里書來湖口縣片帆
人上秣陵船長風捲浪花如雪極浦連天草似煙何處笙歌
江水沸令公祠下響神絃

皖城

新開幕府控嚴關
南北舟車判此間
落日淒涼余闕墓
浮雲斷續皖公山
蕭蕭木葉吹難定
渺渺秋鴻去不還
江上幾年銷戰伐
石苔堤草自斑斑

武林懷古

趙家宮殿莽寒煙
鎮海樓空夕照邊
石鏡雲橫州十四
水犀潮落弩三千
疏鐘細雨湖頭寺
短檣輕橈閘口船
欲向孤山尋處士
梅花香雪落紛然

徐晟二首

晟字禎起一字損之長洲人諸生有陶菴詩刪

靜志居詩話禎起交情真摯惻惻無華雖以陶菴目稱不盡規撫栗里

除夜寄家舅客僑水

草草摧殘臘沈沈接早春屠蘇今夕酒客夢各鄉人望斷吳江樹身疑谷口津隔年風物好別見柳條新

送友之越

月照吳江冷春從越地開孤雲一雁下匹馬萬峯來意氣銷兵革英雄半草萊異鄉朋舊好不放故人盃

陳三島 二首

三島字鶴客長洲人有雪圃遺稿

靜志居詩話鶴客志士所居蓬戶席門而求友者不及中懷孤憤恒露于眉宇之間其詩華整之中間以清商變徵之調惜乎早逝未盡其才

送友人之楚

此去巴陵路秋風傳鼓鼙長江舟上下落日爲東西野狹窺
人面山雲信馬蹏祖生長自往旅夜聽鳴雞

贈朱錫鬯

抹藥吳門市逢君已暮秋涼風吹錦纜明月照芳洲叢桂王
孫樹幽蘭帝子邱小山如可賦紉佩共淹留

盛斯唐
二首

斯唐字集陶桐城人僑寓金陵

金陵詩徵集陶居金陵十廟西門毀垣敗屋蓬蒿滿
徑與林古度唱和晚以目省屏居不干一人

落葉

空齋樹晚儘風乾搖曳聲頻不忍看斷柳枯桐無意緒清笳
夜月總荒殘吳江信是裁詩冷南浦其如送別難一自青楓

獨玉露巫山巫峽至今寒

懷林茂之

幾度思君輒賦詩羽飄鱗鬣每差池舊栽柳色曾無恙新買
帆風未有期千里夢回秋雨細一燈愁擁夜涼遲病中添病
人無那老眼開知應淚垂

譚雅一首

雅字岑止茶陵州人

沅湘耆舊集岑止早歲常從瞿稼軒先生軍亦殷頑也劉杜三聞譚岑止又移寓石盤山御寄詩有舉家真耐白雲寒之句可以想其風味也

海上立秋

匡山往事易驚秋忍對西風賦壯遊擁眾田橫猶伏島依人

王榮且登樓飄零家國生何益莽浪乾坤死便休盡說窮愁
詩易好慙無好句答窮愁

方祖兆 一首

祖兆字昌祚莆田人諸生

蘭陔詩話昌祚工書法亞於朱比玉

宮詞

紈扇已經秋紅顏欲銷歇夜深下玉階獨拜梧桐月

王萬禎 一首

萬禎字日華一字望甫上元人貢生有香醉山房存

稿

新亭

話到新亭不忍登六朝遺夢剩孤僧永嘉人物知餘幾依舊

江光一片澄

楊昭一首

昭字明遠先世清江人移居長洲處士補子有懷古

堂詩五十卷

有學集明遠高才盛年遁迹自引疏布不厭妻子凍餒長篇短詠矢詩遂歌響振林木徐柯父上元顧與治高濂邢孟貞咸嘆異之甲申乙酉之際潛夫歸鄧尉山為終隱計肆力於詩規模少陵字拂句比不失尺寸故其所見潛夫詩益喜且高飾虞山錢宗伯故舊其父古農四老之目虞山沒其志為序而刻之有魯兩生漢四老之目虞山沒東吳司成王奉常亦稱焉而尤為甯都曾燦益都孫寶侗來陽宋琬所激賞潛夫專摩少陵為詩史之學五十年中市朝改易陵谷變遷寓其感憤皆於詩平發之至二千餘首都為五十卷有為之言為多

靜志居詩話明遠詩評者比之雪山醍醐吾嫌其太滑
田拔明遠父子偕隱陸墓邢石口贈曰補詩云尙憶
南徐別春風五六年生涯牛口下衰齒雁行先羨爾
移耕具將家稅野田相過憑一葉已到鹿門前又酬
明遠詩云亦是衡門士寸心有所期郊扉常獨掩樂
與州府辭可以想其高致

寄徐昭法

卜宅聞君在上沙共言此地最清嘉山田秋斂家藏米園戶
春深人採茶杯蟻綠時浮竹葉樹雞黃處落松花逃名鹿豕
爲羣久過客休題高士家

車以遵一首

以遵字孝思一字孝則邵陽人參議大任子諸生有
聲香閣草高霞堂正續集

陶汝弼三首玉堂集孝思生於閩長於吳越老於楚南
其文與人俱翩翩有凌雲氣
楚風補高霞居士著述甚富早年與鍾譚齊名屢經
辟舉不就亦玩世逸民也
田按孝思楚人知有鍾譚而已古詩亦有真氣

日復一日行

一日復一日牽絲不盈疋三萬六千場眼見有時畢蒼海爲
桑田此度已非一老子念孫子孫子復見憶古之大聖賢各
自有苗裔叫及乎千百年莫知所自出朝兮如是朝夕兮如
是夕此日未足多此日已可惜勞勞百年心宛轉爲誰役

蔣之翘三首

之翹字楚稗秀水布衣

靜志居詩話楚稗輯李詩乘四十卷搜錄鄉黨先
正詩無遺兼能備舉軼事使聽者忘倦晚年無子書

籍散佚無餘詩乘亦亡可嘆也

始春日送陸韋公之淮西

乍逢旋別正初春
冷落梅花解笑人
千里江關謀食計
十年烽火苦吟身
交當歧路尤堪重
文至窮時自有神
漫爾離尊何所指
黃雲甲馬故酸辛

詠陸鈿故居

感慨黃公壚
況從聞笛處
羈魂渺難招
日墮淮西樹

忠孝堂

有序

南宋有陶姓將仕郎扈從南來卜居於王江涇三世
矣宋末嘗輸粟集鄉兵禦元宋亡戒子孫無得仕作
忠孝堂以見志藝菊千本五色粲然自號菊隱

錢塘王氣已銷沈
草野猶存報國心
不負柴桑老孫子
冷香秋色一堂深

路澤農一首

澤農字吾微一字安卿曲周人

遊西山

削壁懸空外孤筇入
斷雲峯垂紅樹接石
亂碧流分衰足行
多歎天風定亦聞幾
時攜素侶終日坐秋
雲

程奎一首

奎徽州人

卽事

歌舞叢中度歲華
一朝忽去抱琵琶
前身定是烏衣燕
不入

王家入謝家

靜志居詩話崇禎癸未湖廣巡撫宋一鶴敗家歸沒官有妾金陵陳氏以色藝聞門客王屋聘焉謝參政上選先期娶之奎因作詩嘲笑一時爭傳誦云

屠嬭一首

嬭字閻伯嘉與人諸生有大經堂集

靜志居詩話閻伯言無枝葉行有規矩詩亦雅正不以風華見長
梅里詩輯閻伯鼎革後絕意進取張考夫題其所居云霍原六聘山焦先三詔洞漁子定迷津遮莫桃花種高致可想

過嚴先生祠

江水日夜流揚舫漸迴遠丹扉阻層巒高墳隱深阪灌木繁行雲凝睇何繾綣抗手發長謠髣髴見遺範策吾鹽車足豈

嗟年歲晚

李麟友 一首

麟友字振公一字于苑嘉興布衣有醒齋詩草

春暮有懷朱十彝尊客越

飛花三月暮春色滿江關芳草天涯路王孫去不還

李生乾 一首

生乾字梓甫鄞人

送朱廣文

夙有蘭蓀契仍同汗漫遊相看俱短髮不繫是孤舟道直傷
如砥途窮只做裘莫須悲去住吾道在滄洲

楊運吉 一首

連吉字彙征卽墨人諸生有悠然廬集

村居

寂寂山村僻居鄰不數家柴門終日閉生事任年華細雨滋
秋草緒風開野花邇來從吾懶常是對煙霞

徐篤一首

篤字行之曹州人諸生有墨莊詩草

春日懷邱子星

把酒不成醉物華空眼前向來同意氣別去廢詩篇芳杜愁
無賴垂楊春可憐美人竟何許望斷楚雲天

葉有馨一首

有馨字子聞吳人有咸悅堂集

登靈巖山

吳王宮館空山曲西施洞口春草綠昔日雕闌凭翠娥今日
招提散金粟古藤離繯覆井床轆轤素綆動寒光山前一片
五湖水琉璃萬頃空蒼茫點點羣峰噴白霧隱隱漁舟問煙
樹青楓碧柳越來溪平沙欹石鴟夷墓江南二月花如茵江
南三月花撲人嬌歌豔舞可長樂吳王宮館無黃塵

何蔚文一首

蔚文字稱元浪寫人

田按釋元有句云夕陽僧影淡一笑菊花秋饒有別趣

偶爾

偶爾看秋色茶鐺借石支吟詩翻白俗學畫愛黃癡南畝禾

將刈東籬菊弄姿何妨留雅客是我不窮時

徐濟忠

一首

濟忠字良夫又字子公常熟人有綴閒集

田按子公馮蒼已師也有碧戶二十八韻輕豔之作已導二馮先路

聽吳澹如歌

避暑當清夜邀歌宴上才美人殊自愛坐客敢頻催發口芳
蘭襲滿天涼露來簫聲追不得餘韻月徘徊

何大成

一首

大成字君立晚自稱慈公常熟人

寒雨

檐溜似人語催愁攪夢魂村雞曉不曙野火燎仍昏有病欺

貧老無家活子孫
明晨羞攬鏡有雪入髭根

邵濂二首

濂字茂齊一字齊周常熟人諸生

養疴

造物藏吾拙山林合養疴
依雲攤枕席過雨坐松蘿
自識三心淨無妨八苦多
蕭然方丈室應似老維摩

梳髮

髮白真堪惜蕭蕭可奈何
西風吹病樹殘葉苦無多

陸來

三首

來字陶菴吳人

題招隱園賦贈席獻臣朝宗昆季

傍岩倚樹結檐楹憑仗高人得隱名最喜風流承內史

園爲王中

翰延陵所構

卻防徵召出承明短垣常放青山入曲檻頻留野鶴

行竹戶松關行徑絕墅猿攜石置基枰

半塘樓小飲

酒旆高懸七里隄登樓頻喚酒家奚燕知社日歸來早花爲
春寒不放齊佳節屢過人漸老名山相對日初西人生那得
常如此莫惜樽前醉似泥

玄妙觀贈陶鍊師

杖藜何處覓仙桃玉洞飛花近市橋絳簡書傳開石室步虛
聲響接雲霄香生寶鼎丹初轉名列蓬壺路不遙讀罷黃庭
佳客至星壇可使挂詩瓢

明詩紀事

貴陽陳田輯

平

華淑二首

淑字聞修無錫人

列朝詩集聞修讀書惠山之下肆力古學取古人詩
與本朝作者下上揚其詩以清新深婉為宗雖問
津於時人而能不墮其鬼趣嘗自敘其詩曰吾不取
一時之好冀千百年後有一人知我千百帙中存其
一帙千百篇中存其一篇而吾二十餘年心血或藉
此一帙一篇以傳噫聞修已矣其所謂一帙一篇者
庶其在是乎

草臣心甫聽雲晚過斷園次心甫韻

殘暉如月尚招尋
同侶夷猶興易淫
荒徑但容逋客往
閒門

一任綠煙深流鶯入竹移雙影鄰樹過牆落半陰剩有微情
委空觀共君吟眺亦無心

隄月聽蘇姬樓上理曲

高樓銀燭夜歡殘一曲琵琶月下彈拍遍閒聲人莫會自將

紅袖障春寒

陳鴻 五首

鴻字叔度侯官人有秋室篇

書影侯官陳叔度家貧無人物色之曹能始石倉圖
在洪塘中有森閣集諸同人爲詩叔度有一山在水
次終日有泉聲句能始嘆賞爲之延譽因卽以石倉
爲居停名其詩曰秋室篇取李長吉秋室之中無俗
聲也丙戌之變能始殉節叔度年七十二不能與存
以貧病死無子不能葬戊子子入閩時客以其詩來
予悲其蒿露謂客曰子任其葬子任其詩曰助以金
挽諸生徐存永董其事先是莆田布衣趙十五名璧

亦工詩善畫枯木竹石閩人珍之然性孤僻不多爲
人作惟山房寺壁則淋漓墨與叔度先後死亦不
能葬存永因舉十五之棺與叔度合葬於小西湖之
側予爲書碑曰明詩人陳叔度趙十五合墓客刻叔
度集子爲之序板式精好傳之南中莫不知閩有陳
叔度矣十五不多爲詩無傳者
十五國風高言集田歸淵曰叔度詩神理既清丰神
復秀記貞心於妍貌隱摯念於雋言董倉水曰叔度
詩清思泉湧麗句綺合風調流利蘊藉有餘

燒香詞

玉爐桂火微不煖雲母屏開月華滿永夜銀床怨合歡襪羅
起踏秋空寒珠簾半捲桐陰綠卻恨明璫聲斷續心事悠悠
寶鴨知涼風綉帶輕相吹

九日懷興公

遠別又重陽依依劍水長客魂消此日秋色過他鄉野店寒

多雨山城夜欲霜一尊花下酒誰對紫萸香

聽泉閣

風露臨虛閣應涵秋氣清一山在水次終日有泉聲響逐僧
鐘落寒隨客枕生中宵滿欄月都作玉琴鳴

衰柳

依依芳質怨年華卻憶深藏小小家委地誰憐唳露葉隔江
偏妬拒霜花淒涼舊巷空嘶馬搖落長隄尙聚鴉不似漢宮
寒食候東風輕送萬條斜

淮陰旅懷

一帶淮聲繞郭流黃昏人上水邊樓經時尺素稀聞旬此夜
孤燈隔楚州楊柳已凋終綰恨蘼蕪雖死亦關愁客心處處

驚搖落古壁西風蟋蟀秋

王彥泓 二首

彥泓字次回金壇人以歲貢爲華亭訓導有疑雨集

列朝詩集次回恭簡公樵諸孫博學好古詩多豔體格調似韓致光

靜志居詩話風懷之作段柯古紅樓集不可得見矣存者王溪生最擅場韓冬郎次之由其絨情不露用事豔逸造語新柔所以擅絕也後之爲此體者言之惟恐不盡詩焉得工故必琴瑟鐘鼓之樂少而寤寐反側之情多然後可以追韓軼李金沙王次回結撰深得唐人遺意誦之感心嫻且迴腸蕩氣田按錄詩不廢桑中可以爲戒也後之爲豔詩者幾於勸矣余錄次回詩以備一格嘗鼎者知一臠足矣

爐節江邊讌集

喚得秋孃渡口船竹西歌吹傍江煙敲斜帽影調鸚夜清脆
鈴聲放鵲天香餅煖烘桃葉袖墨花狂污薛濤箋青舟莫負

開爐節繡被濃熏一夕眠

對花雜慙

瓊香一片委輕埃猶憶春時傍砌開腸斷江南陳叔寶麗華
身後卻歸來

張維二首

維字叔維常熟人

懷舊集叔維習畫善吹洞簫度南曲極要眇之致爲
人孤介少不會意輒傲然獨往遺詩落落清泚如其
人

吳江道中

荒村烟白遠連天依約人家葦荻邊忽聽榜歌何處發前溪
深柳出漁船

訪萍踪師卽事

石轉溪迴澗幾重門前一徑度深松老僧獨立斜陽裏閒撥

藤花認鶴蹤

何述舉一首

述舉字公邁常熟人

懷舊集何君公邁娶於秦名淑季公之孫女也君之
王父名鎬與季公俱讀書善草隸故夫婦俱知書君
亦善八分秦嫺雅婉麗夫婦有秦徐之好家蓄古鏡
可愛玩君與婦嘗指鏡爲誓約同生死王午年邑中
大疫君適應劉之戚秦遂破鏡半貯棺半繫臂裂帛
自縊家人持之不得決乃笑曰吾志不負昔若能強
我飯乎以遺孤託其夫之兄弟不食十二日而卒臨
歿盡毀其贈答諸篇故秦詩不存嗚呼徐媛傷生不
載范史劉子玄以爲譏以秦較之烈殆過焉埋沒草
野逢此世難表章何年子故識之以俟後世
田按秦淑事明史未採已蒼懷舊集亦不甚傳余錄
於此集以待後來之編史者

秋原晚望

如何脈脈此心中四望迷離路轉窮
曉夢但隨歸燕遠秋思難寄逝波東
愁和烟靄山山紫淚染枝頭葉葉紅
想得宵來眉黛淺莫教纖月度簾櫳

錢孫艾一首

孫艾字頤仲常熟人處士謙貞子

甲申夏月飲集張氏池亭次伯兄韻

臨水亭臺觸處涼
芰荷香裏趁殘陽
山川入目都成恨
風景驚心更斷腸
瘦骨未堪波影照
閒情聊逐酒杯忙
不知微雨還多少
珍重銀蟾欲到牆

徐錫祚二首

錫祚一名于字于王常熟人

列朝詩集于酷愛晚唐宋元詩多所採輯嘗集唐人句爲百絕效李鄭蕭綰集以悼歌伎王桂好事者猶傳之

春日漫興追和唐伯虎二首

不學尋真不坐禪
烏藤白衲且隨緣
有時貰酒呼鄰叟
排日尋花買釣船
鼠迹共依塵榻住
鶯聲欣傍小窗圓
阮生何事窮途哭
但坐茆茨便得仙

少不如人不近名
臣今老矣一無能
長生敢慕金莖露
消渴甯思玉井冰
水榭看花春載妓
地爐煨芋夜留僧
往年舊侶崢嶸甚
片紙寒暄愧不曾

秦徵蘭十二首

徵蘭字楚芳常熟人諸生

靜志居詩話德陵寔錄爲黑頭爰立者所搜天啟四年七年事遂爾遺佚秦秀才宮詞拈撫禁庭瑣語頗稱詳核第合而觀之嫌其述客魏居多而事闕德陵者寡不無微憾耳
田按楚芳宮詞傳爲陳傑所搜今據詩綜更正

天啟宮詞 十二首

寶冠隨獵競相誇雲擁雙龍雉尾斜
衆裏閒評誰最稱玉人

含笑看高家

內臣所戴金絲束髮冠舊有此式至當時而加侈焉蟒龍蟠繞下加翠額插雉尾前捧朱纓傍綴寶玉王體乾輩侍駕圍獵多戴之兼衣窄袖戎衣束小玉帶蒼顏豐軀最不雅觀相富者惟高永壽一人而已

秋風拂面獵場開匹馬橫飛去復來
玉腕控絃親射殺山呼

未畢厥公回

上獵于寶善門魏忠賢馳馬過御前上惡而射之馬中額立斃羣下叩首呼萬歲忠賢怏怏稱

病先還印公厥公皆宮中稱忠賢之詞

皇君次第列銀光

丹陽記齊高帝造銀光紙賜王僧虔

點將標題當飲章

蔡邕傳注

隱告人姓名無可對口日飲章

聖主青年方好武卷頭先問李天王

或有用水許傳

是然星名配東林諸人以供談譚之資如托塔天王則李三才也及時雨則葉向高也崔呈秀得之名日點將錄佳紙細書與天監錄同付魏忠賢忠賢乘間以達御覽上不解托塔天王為何語忠賢詳述溪東西移塔事意欲上知東林強暴有如此徒所當翦也上傾聽嘖嘖若恨不同時者忠賢計阻匿其書遂巡而退

無限春光轉眼空尋思翻欲悔鋪宮花容占斷君前豔推向

雕檐細雨中

張裕如被寵客魏嫉之既而有嫉鋪宮臂冊如禮而過期不育二奸遂力譖於上盡逐侍從閑

如空宮屏去水火者數日如飯甚制旬雨中伏地啗雷水斗許未及上階而卒

萬幾餘層建長廊聖主經營食不遑粉爨未乾宣十作庀材

重築蹴圓堂

聖性好營建迴廊曲室皆手操斧鋸為之然喜厭不恒成而毀毀而復成以是累歲卒未竣功

宮中舊有蹴圓亭上又手造蹴圓堂五間高永壽好蹴圓跑放慈造堂以習此戲十作內官監所轄以給宮中營建之

材料者

異卉傳來自粵中內官宣索種離宮春風香豔知多少一樹

番蘭分外紅

當時都下植異種花草相傳自兩廣藥材中促至內臣好事者遍栽於聖駕常幸之處有蛺蝶

菊紅水仙番蘭柿等名番蘭紅花碧葉上愛而玩之移供案間或云卽美人蕉

貼裏三襴夾裏花中官應節關豪華因逢廟忌更青素瑟瑟

波紋襯海霞

紅蟒貼裏貴近臣內衣也諸權璫皆衣之色之淺深隨時異宜又於郝襴下加一襴名曰三襴

又初爲雙袂兩蟒衣兩袖各加一蟒舊制遇大忌辰及修省中官衣青素襴廟忌辰衣青綠花樣所謂青素者夏則屯絹冬則元色絳也當時用天青竹綠花紗羅當青素襯海天霞色淺紅裏衣內外掩映望之如波紋木理焉

封事連章奏至尊宮前暫罷選龍孫

青海之外馬多龍種名曰龍孫角羊斑

鹿分收過千騎雲屯北上門

內官有陞騎馬者凡遇慶典人進馬一匹駕御乾清宮門覽畢

付御馬監本官給賞馬不堪用該監不收換補大內官賞過祿米者亦於是日進一羊一鹿鹿必大白斑羊必四角六角

鹿付南海子羊付牲口房此舊例也魏忠賢因各邊缺馬蹶
陞騎馬數百人每歲進十餘次每次千餘匹臨期忠賢不復
奏聞竟自至北上門盛服危坐按職名牽馬魚貫而進不堪
用者重加責處於是馬價倍昔

玉兔迎霜秋宴開花城侍宴暫徘徊蕙蘭香細鶯聲輒報到

高家小姐來

重陽前後內官設宴相邀謂之迎霜宴席間食

後者軒前者輕望之若山坡五色燁爛無隙名曰花城御前
牌子高永壽年永弱冠丹脣鮮眸皎好若處子宮中稱高小
姐宴飲之際高或不與合座爲之不歡

坤甯花落砌痕斑書卷爐香伴玉顏鏡裏尋思燈伴語承恩

端不爲幽閒

張后既失寵絕不露怨望之色惟以文史自娛
或清座絮絮獨語

畫裏明妃絕代無琵琶千騎擁雲茶君王不愛傾城色只看

猱猛揭蓋圖

李伯時畫昭君出塞八幅趙子昂畫鬼子母揭
蓋圖皆累朝珍藏舊物也兩種並陳上恆棄此

取彼聖性樂觀險怪之狀而厭近窮窳略見於此

分明角勝厭棋枰井字闌邊鬪棹城十五燕姬偏慧黠雙拋

常占上中營

神廟中葉御意初為棹成之戲用色羅方幅繡井字界作九營中一營為上營四方四營為中

營四角四營為下營命宮人持銀錢或小銀毬擲之落上營賞銀九兩中營六兩下營三兩落營外或落井字上罰如中

營所賞之數雙擲賞罰皆倍由是諸宮爭效之至戊午邊事大壞說者謂棹城者掠城也殆先徵云天啟時猶沿之烈皇帝登極禁止

林雲鳳

二首

雲鳳字若撫長洲人

書影吳門林若撫老而工詩滄桑後匿影田間雖甚貧不一謁顯貴庚午秋吳眾香開星社於高座寺時社惟子與餘姚黃太沖桐城吳子遠年皆十九若撫賦詩贈子並曰白社初開士景從同年同調更難逢誰家得種三珠樹老我如登羣玉峯書寄西池非匹鳥席分東漢有全龍慈恩他日題名處十九人中肯見容

靜志居詩話若撫當鍾譚飲張之日守正不同詩篇

極其繁富惜知者寥寥因既終老相如遺草已不可問矣

暮秋同姜如須林衡者顧茂倫登虎邱

虎邱名勝虎谿同載酒重來問遠公
草木正逢黃落後樓臺多在翠微中
池深暗受三秋雨塔迥虛含萬里風
此日登臨須盡醉莫教搔首嘆飛蓬

送春

香隨燕子入春泥忍向尊前唱大隄
暗水尙流花徑曲斜陽不盡草亭西
鳥如惜別聲偏澀山亦含顰黛欲低
老我將歸仍戀戀醉中得句醉中題

王邦畿 三首

邦畿字說作番禺人貢生有耳鳴集

辛籤卷三十二

八

有學集王君詩學殖富意匠深雲浮臚流殆將別出於諸君子之間

徧行堂集說作詩諸體皆工其五七言律真足奪王孟之席

漁洋詩話東粵詩自屈梁程陳之外又有王說作王震生陳喬生伍鐵山數人皆有可傳說作句如雲低滄海樹潮上夕陽城曙色寒山外秋風古渡前殊近錢劉又有絕句云昨冬歸去今春信言是端陽入楚山吟取荊州舊時事洞庭秋盡客應還

留別

落日荒郊遠高天古渡寒未潮先候信有酒且同歡水白漁燈溼霜黃海氣乾鄉心與朋好去住兩情難

出門

昨日方還里今朝又出門似寒能迫我辛苦復何言疲馬斜陽路深煙遠樹村不勞人重問芳草識王孫

江城三月曲

江天漠漠雁鴻飛
草色青青麥葉稀
猶憶溪邊舊時節
杏花三月鯉魚肥

薛始亨

二首

始亨字剛生廣州順德人諸生有南枝堂集

廣東詩粹剛生博學好奇節遭亂匿迹山林自號二樵山人

詠懷

促織助貧女方寒
憂授衣杼軸有時歇
中宵鳴更悲借問裁
縫成爾甯預寸絲
舍緯恤宗周嘗聞有
婦嫠賦性各有異何
必俱懷私

晚出尋梁海曲

江上初有月獨行尋故人蟲聲出露草漁火隔煙津門有歸
農過家爲廢圃鄰夫君顏色好長嘯倚松筠

吳淹一首

淹字德亨歙人

田雀

黍田早歸來卑棲在荆棘莫啄秋紅子留作寒冬食

吳濡三首

濡字德裕歙人

題畫三首

雨晴春又晚纔試踏青鞋野碓雲春石山溪水放簾歲豐饒
地利城遠少官差彷彿武陵境桃花放兩涯

楊花如雪落風色轉南薰野店雲埋徑山行護門晚行嫌
虎迹俗憩喜禽言驛舍曾經過題詩壁尙存

草堂新卜築渾似杜陵莊溪澗秋無雨林葉夜有霜杖藜隨
鶴步坐石看雲泐心迹天遊契風清兩鬢霜

劉元祥一首

元祥字瑞圃丹陽人國子生有詩集

春日遊惠山

招隄萬松裏春日此幽探雲氣流孤壑湖光帶遠嵐僧從花
底出禪向靜中參醉倚紅亭望漁歌落暮潭

劉永滋一首

永滋字潤之寶應人

過吳日南故宅

南華山人去不回
茅龍誰復翦蒿萊
卻金亭上青青草
二月春風燕子來

楊誌一首

誌字石甫當陽人諸生

遊玉泉寺

鐘磬門初啟
松蘿道半遮
泉清堪洗耳
地勝欲移家
客指前朝鼎
僧傳乳鉢茶
未須求證果
生滅在聞鴉

王璠一首

璠字崇樸黃巖人有一笑軒稿

毘陵驛

三冬雨絕河水乾
毘陵驛前舟可憐
越客琴書懷遠道
吳門冰雪傍殘年
幾家砧杵寒城外
何處漁歌夕照邊
濁酒可沽須盡醉
旅愁今夜正紛然

周書 一首

書字一中臨海人

答裘慕山

雨過邱園花事稀
深春猶自滯歸期
秋風匹馬兩年別
清夜月明千里思
芳草欲迷南浦路
白雲旋長北山薇
盛朝公論應長在
不信高才尙忤時

楊靜 一首

靜字定夫常熟人知縣舉子

田按定夫年二十二而卒能詩文父彝將之令都昌
以定夫歿罷往踰年都昌陷顧麟士有詩云罷令人
猶歎未行旋聞賊已陷孤城臣忠敢不為君死子天
方知代父生一室餘魂聞涕淚萬邦多難望昇平由
來倚伏皆無定豈但應寬砥憤情定夫有遠識嘗曰
邊鄙日蹙國勢日危社稷已為虛器而儒生猶持干
祿之文日吟歌之至於時政兵謀一切不省一旦賊
人渡河士無選鋒城無堅壘將與造化者遊於無何
有之鄉君父且不可得而況名與富貴乎定夫死之
三年乃當甲申卒一一如其言云

懷人

閒來託思在天涯
落落河山重可嗟
留客未懸徐孺榻
憂時終望范滂車
寒雲晚送機峰翠
春雨晨催蔣徑花
四海只今戎馬隔
故人才筆自風華

程梧一首

梧字來鳳休甯人

莊居初夏

山扉寂寂竹籬短榴花枳花相映開
低枝巢鳥人不取日日將雛自去來

程廷橈 一首

廷橈字用達休甯人

閨情

落花時節雨霏微
翦翦輕寒透縠衣
燕子不知離別恨
雙雙常遶繡簾飛

程九皋 二首

九皋字子方休甯人有潭西樓稿

橫山北築

幾入山中去幽偏好避名谷空唳鳥寂風靜落花輕一水斜
通澗千峰曲抱城應忘去與住世事不關情

山居吟

青嶂高不極白雲深更深牽蘿堪補屋種樹已成林午夢鳥
能喚秋懷蛩解吟此中有真趣誰識出塵心

錢秉鐔一首

秉鐔字幼安桐城人

山中看桂喜友人見過時舍弟滯嶺外

山中無故友叢桂足相知人老兵戈裏花殘杯酒時淮南消
息好嶺外雁鴻稀明月猶堪賞還期一扣扉

齊程一首

程初名維程字子安更名後改字遜元桐城人

望南畿

鐘陵淮水海門通吳楚煙波一望中鐵鎖夜銷寒浸月戈船
朝駛浪迴風襍襍戰士歌江北刺繡明姝怨大東漢使節符
曾不至逍遙河上立奇功

方穀一首

穀字子桓桐城人諸生

白帝子歌

四維茫茫渺難極載方舟兮治水入神女璇宮當夜織倚瑟
鳴絃聲清歷知音娛樂恣歡翕遊放滄湄何所息

明詩紀事

貴陽陳田輯

辛鑑

吳用鈐一首

用鈐字士衡桐城人以蔭除內閣中書

金陵懷古

一曲歌殘王氣銷
臨春盡草蕭蕭
軍書床下函仍閉
鐵騎城中檠已調
玉璽驟驚歸北國
美人猶自設南朝
賞心亭畔孤魂在
寒雨淒風自寂寥

彭堯論一首

堯論字君宜夏邑人官南昌通判有西園公子集

書影彭堯論余鄉夏邑人工爲許多讀書有氣調常遊京師遇竟陵鍾惺與談不合奮拳毆之可一笑也

鏤金老人行

鏤金匠作口無食泣向街頭賣弱息自言少時侍先皇金珠
日費千萬億宮內大璫貢獻多盤龍結鳳人巧極通明鱗甲
儼生成飛動天吳絕雕刻製成獻入未央宮未必至尊迴顏
色當時酬價比黃金眼前顧盼生羽翼今上御極聖且仁諸
璫斂手皆潛匿我輩技窮饑欲死奇珍不獻君王側老人賣
兒將買贖明日城南親稼穡我聞此語感聖恩不將翫好窮
民力黃金土賤埋人間此老力耕計良得

鄧祥麟一首

祥麟字玉書一字子與武岡州人

一作新甯人

官岷府長

史一作官

審理

沅湘耆舊集玉書工詩善畫書法絕類二王鼎革後
結廬新甯之石田鵝峰山下時釋一念以上元將家
子祝髮南岳寓新甯獅蹲閣玉書與爲方外交一念
死哭以詩并編其集

輓一念和尚

相逢廿載不言家頗道鄉園近雨花老向金城常賣藥閒依
石鼎獨烹茶窗櫺尙放江光入几榻猶邀竹影遮蒲室香燈
歸幻寂春風一塔繞嘯鴉

陳濟生一首

濟生字皇士長洲人祭酒仁錫子官太僕寺丞

三岡識略吳門陳濟生陳公仁錫之子也懷宗投年
曾刊啟禎詩選序吳相國姓所作中有二祖列宗語
奸人沈天甫呂中夏麟奇以爲奇禍挾詩索多金不
遂令僕葉大出首刻造逆書詆誣本朝詩冊列名

七百餘人宜遣官提訊旋奉 上傳天南等所指事
絕無憑據編詩之陳濟生久經物故帶詩之施明又
經逃遁顯係奸徒扛扶挾詐俱斬東市是舉也一則
解文字之禍一以杜告訐之門眾共快之麟奇我郡
明經不知何苦而爲此也
靜志居詩話皇士經亂歸田緝啟楨兩朝遺詩又命
工傳寫明三百年來忠臣義士像裝以爲冊可稱奸
事矣惜其詩鏤板未終而像亦爲蠹魚所蝕覽觀者
惜焉

遊仙詩

枕上廬山枕下江經年高臥碧淙淙黃羊叱起成千隊青鳥
飛來更一雙髣髴真仙能送酒玲瓏玉女解開窗只嫌李白
多豪氣一點雄心未肯降

劉昌運 一首

昌運字明卿如皋人貢生除宿國教授有味古堂集

渡江

舟下江流急望中日已斜入雲惟鳥道傍水少人家隱見看
山色浮沈逐浪花片帆吳地近到岸卽天涯

黃翼聖

四首

翼聖字子羽太倉州人以薦授新都知縣遷安吉知
州有蓮蕊居士詩選

有學集子羽爲人孝友順祥自牧若處女居官難
着事以廉辦聞晚而修香光之業爲詩清新有雅思
序而定之者徐元歎也

壽家奉倩初度二首

看看竹馬事嬉遊此日樽前共白頭兄健轉嫌增弟老國亡
何忍爲家謀譜成節烈平生事賣剩田園數畝秋一任時人

笑癡絕五更頻夢復神州

吟聳雙肩骨帶仙亂離贏得一身全
郊增新鬼多吾友籍入遺民亦信天
蕭散別裁方外服團圓常說在家禪
不須更覓長生訣學得饑飡與困眠

和范石湖田園雜興

谿鳥谿雲莫浪猜更無名利到胸懷
倦腰每仗藤扶起還恨當年五斗來

暮雪如縫雨半兼石坡荒澹竹廉纖
小窗自愛雲林畫冷逼匡床不下簾

閃知愿一首

知愿江甯人桂王時官待詔

天涯

天涯萬里病如僧
舞榭歌醉未能獨
向點蒼山上望浮雲
何處是金陵

談亮 一首

亮字晉若富順人
桂王時授義甯知縣
遷麻哈知州
入國朝削髮爲僧
居遵義臺山寺有賣閒愁錄

書瀝膽將軍遺事後

銅鑼木枿荷神船
奔走離奇過四年
一片御衣歸不得
孤臣何處哭殘天

陳啟相平水集黎維祚字名遠江津人幼不肯竟學
惟卜算形家是賦遭亂轉徙家遵義會永厯狩緬時
諸爵鎮將各擁眾拒守維祚憤惋號泣徧走告以大
義皆所幸各密草迎繼奏付達維祚乃令諸奏窾木

桔三尺許藏其中用荷蓀鎗等物挾術以行時庚子
正月二十二日也至辛丑九月十八日抵孟良府說
晉藩李定國晉藩色動維祚破格出諸奏相示晉藩
義之十月六日給以令諭一道轉奏時駕在阿瓦城
城左右夾河洪波浩渺相距五六日程祇聲息通主
臣不得見隨奉勅云皇帝密勅遞潛將軍黎維祚據
晉藩奏爾忠肝貫日義膽渾身穿虎豹趨宸極烈風
勁草殊軫朕懷茲授爾遞潛將軍督理慎黔楚蜀徧
勵諸助將士山林隱逸等謹慎固防枕戈以俟侯晉
鞏兩藩舉師四路策應旦夕是圖勿遲勿忽十月十
五日拜受訖並收空旨百道印三顆造複底小舟密
藏之木刊諸神像擊小鉦鐃肩唱以行晉藩大喜以
旌甲擁至近界時晉藩馳約章藩白文選共攻阿瓦
復命比至騰越時晉藩馳約章藩白文選共攻阿瓦
阿瓦本城七重已破其三夷日收不過欲見乃皇帝
耳幾年如第一朝背棄何益姑止攻三日當送出否
則我亦有變計一任汝為不得已從之閏二日右河
船密知木葉內外夾攻兩藩覆沒幾盡自是兩藩分
散晉徙他夷所羣謀恢復據騰越馬寶與鞏素相
白營遙呼曰我隻身來說好話者諸軍勿動遂入相
見告以密謀言吳願與白台白受所結有艾將軍者
滿洲人亦惟約附從相與鑽刀血會上由別道亦

爲維夷送居草殿三間白兵環其外吳兵又環之
維祥至艾道入見上見維祥大哭維祥泣曰事今至
此臣維急奔告諸營整兵於要道接駕上曰兒子爾
可致意十五家等若能救我出我只願修行去喫咽
不能言手翦御衣一片密寫敕付即行晝夜兼行抵
荆侯營謀共於偏橋接駕復入滇偵探駕已崩於王
寅三月矣維祥呼天搶地恨不卽刺刃吳逆之胸狎
狂逝去不知所終

陳啟相一首

啟相字枚庵富順人僑寓遵義貢生桂王時授河南
道御史入國朝削髮爲僧更名聖符號大友居掌

臺山寺自稱掌山老人有平水集

黔詩又署枚庵康熙壬寅來遵義隱縣南平水里掌
臺山寺是不越戶者將三十年有時餓寒嘯歌自得
一編一鉢蕭然人外

九日

黑雲如甕箐光寒一盞醪唇醉不堪報道蟹肥新釀熟雨中
清夢足江南

明詩紀事

貴陽陳田輯

藏

傅爾元一首

爾元字澹方桐梓人崇禎中拔貢有居易堂集

點詩紀略澹方少年英異四川提學錢邦芭目爲蜀才第二邦芭隱餘慶之蒲村復負從之遊居易堂詩涉筆生硬情味稍乏而陵陵風骨亦自不凡

樹

花發老枝不醜選巢多宿名禽山人根底閒坐綠葉榭煙自清

王承之五首

承之字季安華陰人有澗辭十卷

東陰商集王子詩凡夫纖音淫曼之詞刻薄弱之格皆其所荷及而逐之者
田按季安詩音調渾雅具有唐格關中詩人之秀

姑蘇懷古

雲迷雪沒百花洲
響屐新粧乍可留
館娃煙靄還日夜
錦帆風雨空山邱
自來自去月如駛
那照吳王與西子
萬點殘鴉春殿飛
請君試聽宮前水

七夕

河漢杳無際
涼風吹素秋
不知牛女恨
幾許別離愁
明月光初下
寒雲澹欲流
人間與天上
浩蕩總難酬

同元昌兄尋山贈玄上人

尋幽千仞上，獨喜揖高僧。吳越經遊遍，湖山勝覽曾。長松分
妙偈，明月澹秋燈。誓話浮生罷，天風散鬱蒸。

家兄僕北歸先寄

一自河橋別，鄉園夢裡看。天寒爲客苦，地僻寄書難。遠樹分
行直，鳴鴉落照殘。望中紛意緒，憑汝報平安。

銅雀臺

寶曆隨流水，春風斷綺羅。蛾眉今不見，鳳輦昔曾過。廢苑留
山月，深宮半薜蘿。西陵松柏樹，猶挂暮雲多。

侯廼二首

涵初名弘，字研德，號掌亭。嘉定人，太學生。岐會子諸
生，門人私謚貞惠先生。有《掌亭集》。

寄智舍弟

堯峰文鈔研德受經陶菴黃先生之門為陶菴所引
重王師下江南侯氏禍患踵至從弟歸亡命有司
捕一切多寡肥瘠不較字仲兄遺腹子恩勝於已出
少博覽強記無所不通討論天下大事每豫揣成敗
亦無所不合論詩則欲別裁偽體而極之自得以為
苟自得之師心亦非也於詩絕不苟作或一日數篇或經月不
得一篇所著掌亭集凡若干卷蓋自陶菴沒而研德
繼之諸儒利能得師傳者必首推研德云

目斷秦庭馬角生家山雲水各吞聲三年一見無餘話千里
孤筇又獨行未卜相逢空有約莫輕此別遂無情江湖海日
題詩在莫遣紅塵識姓名

春感

江左君臣譙笑同軍烽俄照石頭紅金滕事秘河山改玉樹

歌殘禁苑空九陌已沈青海日六宮猶望錦帆風祇今寒食
鍾陵道石馬何人指鬱葱

顧在觀一首

在觀字觀生松江華亭人諸生

王昶青浦詩傳在觀博覽羣籍教諭楊文聰重其才
命二子愛生貞生師之文聰薦置馬士英幕府時寇
盜充斥士英裨將黃得功劉澤清力戰淮沔間常有
克捷而論者抨擊不休上英患之在觀曰公素懷坦
白無所附麗近嘔懷甯衆情不免致疑耳大猷却之
深以爲恨福王初士英入相在觀首以起用老成分
別邪正爲言一時若嘉興徐石麟會稽劉宗周長河
徐汧華亭許譽卿夏允彝陳子鏞並登啟事而大猷
以名列瑄案久爲士林不齒思詎東休諸人策立他
藩以嚴切票擬上英笑不應大猷怒曰東林間葉生
在汝家我國知無能爲也在觀嘗語上英大猷有志
爲所欲爲此事關公門戶且以告上英子鑒繼我深
至於挽轡抱項涕泣隨之諸君子得以從容引退未

出亦各高詔里門不致起同文黨錮之獄在觀力也

金陵懷古

十年不見石城秋萬事皆隨江水流
晉代五龍空往讖謝家雙燕有新愁
千門衰柳懸殘月一劍清霜感敝裘
滿目相逢無限恨那堪重上仲宣樓

蔣易一首

易字前民江都人有石閭集

遺民詩前民與杜潛王猷定友善工五言律詩兼畫

清涼山頂留別于皇

招提上夕陽別酒置崇岡秋老孤帆色人輕百戰場
江雲平楚岸風葉減吳霜來日空回首思君獨渺茫

沈祖孝二首

祖孝初名果字因生一字雪樵烏程人有湖干硯廬
當泣陶年吟安下簾等集

靜志居詩話雪樵至性之士詩皆從肺腑流出

白下懷顧茂倫湖上

白下孤筇亦浪遊西湖有客共誰留江山到處聊青眼詩酒
驅人愧白頭弔古何須悲叔寶乘時猶得數錢鏐
陽煙滅寒潮斷笳鼓年年滿越州

九日同東籬登王老露臺

望裏雙峯夕照懸一泓如鏡見湖天風流老去應人後雲物
他鄉轉自憐佳日有臺聊復爾古人無酒亦凄然白頭破帽

垂垂立憶得閒居陶令篇

石可璽

可璽字石丈山陽人諸生

養一齊詩話吾鄉石石丈論詩云今之作者不勝于
鄧弼北趙則附於公安景陵詩以位置佳尚揀取他
人之性情而私為己有自謂之有蘊恥乎昔鍾磬
司空與皆作詩品二字都排向外面去石丈說刊無
蘊恥上方足為詩品的解耳

讀曲歌

人皆樂歡笑郎獨無言語非郎無言語窺側眉未許

立秋前一日偕劉七成諸子飲黃居擬郎中喜春郎度

曲

檐鈴風響亂松聲涼月照人襟袖明冷燭畫屏紅粉意澹雲

河漢故人情潯陽舊淚弦中落楚客新愁笛裏生一夜清歌
催木葉明朝秋色滿江城

湖居

暮色湖上來遠天東漸小一榻坐林中停目數歸鳥

舞陽令潘若稚同男孟觀死節三首

若稚名宏孟觀名澄瀾

舌斷常山落日斜空教明月冷齋衙燕臺六月猶飛雪春到
河陽不敢花

司農有印佩軍門城社雖墟氣已吞到處血腥迷夜火萬家
風雨哭黃昏

雪埋烽火角聲殘魂魄猶依洛水寒月落千山夜臺冷家山
有夢不會還

養一齋詩話石丈弔潘若稚詩云云蓋石丈明季諸生闖賊入京北向痛哭鬱鬱遂卒宜吐詞激烈如此

閔鼎一首

鼎字渭濱歙人有清話堂詩稿

遺民詩渭濱隱居江都性喜讀書常於廣庭設几席樹以紙屏人往來其側目不一顧兼精內典

懷南嶽遠菴和尚

迎師數千里葉落洞庭湖攜鉢猶爲累居山誰與徒詩懷秋月淡禪性野雲孤愧我淹塵世終年此故吾

沈叔竝一首

叔竝字宏度錢塘人

于忠肅祠

于公遺廟南山下旌旆蕭森極望中野老逢春常薦醴石鼉

向晚自嘶風人磨斷碣青霜冷鳥啄荒苔碧瓦空知倚遙天
長劍動暮雲殘照欲成虹

李景福 一首

景福原名澹字梅隱揚州興化人諸生

遺民詩梅隱甲申後學使者嚴檄促試以死辭隱居教授

暮春遣意

三春看又盡身世一飄萍草識王孫意花傷遊子情殘燈和
夢斷濁酒帶愁傾日月年將逝悲歌送此生

徐象襲 一首

象襲字仲丙榆林人

秋興

江上何年別故人臨流相憶淚沾巾
滄桑漫問當時事湖海難容此日身
明月空林驚落葉秋風短棹覓花津
自憐野性耽泉壑豈有桃源可避秦

邵似歐二首

似歐字之文一字漢功鄞人貢生

結埼亭集邵尚書輔忠有子二似歐字之文明經似
雍字之堯諸生同產七人中稱最秀時吾鄉於附奄
諸家相疏斥之並其子弟弗與還往尚書尤爲清議
所惡而之文兄弟別具志節不以家門見外丙戌之
文兄弟侍尚書大雷山中微言勸尚書殉國以蓋前
過不能得已而故王柄泊潁州石浦之間兄弟竭力
資其屏履其後求周公黻雲銘尚書墓龔雲直筆無
所借之文兄弟一慟而已剛是故國遺民至蛟關者
必登邵氏之堂兄弟皆有集傳於後

讀史二首

甘蹈東海死恥尊秦爲帝仲連一布衣片言抉大義當時諸侯王奄奄無生氣

子房圖報韓破產交俠客椎秦中副車十日索不得奇人作快事千古稱豪傑圯橋一卷書藉以興漢業究竟非素懷功成遂辟穀此心誰得知赤松與黃石

顧超

入首

超字子超吳人

靜志居詩話韓高士洽有明詩存選本其最心折者子超之長歌大約兼仿溫飛卿李長吉而神明之惜其全橐求之不得當崇禎之際吳俗談詩者多惑於楚吟以空疏蕭寂相尚子超出入經籍卓然蠶拙之遺

龍潛

紫海珠作宮方壺玉爲勝不有金鐵舟安能遂長往蛟龍走
如絲雷電縮于盎高掇翡翠巢俯褰珊瑚網馮夷仰面唬濡
足不敢上我欲呼巨靈玲瓏納諸掌

鍊墩

黃鶴委羽處雲浪高千尺聞說采香人時逢弄珠客磯頭燕
麥青鷗背漁天白陰火然積砂迴風響秋碧一棹尚可浮三
返殊未肯

張祐別業

寂寂巖前花香散春無奈當年作賦人遺宅生秋籟抱犢溪
澗中尋僧水雲外天子不見收名交竟何賴留得草青青相
傳作書帶

寒夜曲

霜月皎皎睡未能醉眼莫辨光
曉嶒紫梅吹破繭窗雪翠竹
戛斷風檐冰琉璃凍碎膽瓶裂
漏水膠殘銀箭折簾鉤多事
鶴無聊四壁清香幾曾絕西鄰
美人閒金屋繡被錦纏半牀
玉金爐火滅難再溫不畏天寒
畏獨宿兩心相隔無路通一
夜相思空熱中安得東風早吹
拂先傳煖氣入房櫳

柳毅井

仙郎怨別龍閨曉肉麟騎出星
潭早曉穿水母秋一泓世上
餅壘逐雲擾高天露滴桐陰密
碧氣吹香湖上橘玉罌牽斷
九秋絲古鏡照寒千歲漆瀟湘
帝子洞庭君朝來出雨暮出
雲我有尺素不可將還家且放
青溪羊

寺夜有懷二首

團扇初涼怨未休，尺書裁就獨絨愁。
青蟲飛散綠窗雨，白雁叫殘紅蓼秋。
病裏看山惟落葉，夢中尋客亦登樓。
離騷久不輕開卷，今日張燈讀遠遊。

水滴蓮花夜未央，篆香銷盡九迴腸。
僧於寂寞翻殘課，我以相思怨夕陽。
零雨敗蕉淒暗壁，荒鷄疏磬隔橫塘。
林風乍息高窗白，十里蒼山一片霜。

哭吳生

玉藕銀塘映綺疏，鴛鴦樓上畫眉圖。
無端擲碎遊仙枕，從此人間好夢無。

潘問奇

五首

問奇字雪帆錢塘布衣有拜鵲堂集

遺民詩雪帆一生孤寂如僧詩與田梅岑合刻又著拜鵲堂草客死揚州太守傅澤洪重其人葬之平山堂側

夾山寺

窈窕來深谷千峯繞寺平
墓田耕石骨樵徑入松聲
地古春難到山寒水自生
上方茶碗罷塵夢此時清

潁橋晚泊

黃昏到新息此地古來荒
店小門臨樹茅穿月射牀
青芻喧樗馬黑水度山狼
燭盡時聞柝征人苦夜長

自磁州趨邯鄲途中卽事

中宵聞鬻發日出走黃沙
風力能飛石河水不陷車
郊寒騰

俊鵲樹老立飢鴉傍午停征轡炊煙得幾家

讀史

昆池夜火失金川望帝歸時化杜鵑家譜縱編洪武紀史書
難革建文年禍由鼂錯雖無及事續周公恐不然誰向長陵
求木石西山老佛起新阡

肅甯

縣有故瑞魏忠賢
第宅遺址尙存

肅甯池館舊連阡過客追思鹿馬年齊國豎刁呼尙父漢時
朝士拜中涓北司計就書難上元祐碑成事可憐獨喜春來
吳楚地左楊祠火正噏闔

李潛一首

潛字啟美揚州興化人有葉聞齋稿

宿清涼寺

人靜僧初定山孤月半銜石苔侵曲几松雪點危巖座上花
宜散堦前草莫芟興來登北阜目送大江帆

張養重

二首

養重字虞山山陽人

遺民詩虞山俠骨文心蚤有令譽晚年詩愈豪品愈
潔

雨中重過釣臺

再訪先生遇見難空江風雨逼人寒白雲中斷千峰樹碧漲
新添七里灘只有陰晴隨簪笠從無興廢到漁竿回頭前日
登臨地烟滿雙臺何處看

竹枝詞

蕲州竹簟涼于水黃陂葛巾細于紗晚來更挽高高髻喚買街頭水桂花

魏應星 一首

應星字弁山揚州興化人

促織行

促織驚嬾婦婦歎無所織倚樓望明月門戶生荊棘今年絲雖貴筐箱盈萬億買絲忙上軸軋軋無停息豈不畏苦辛將以謀生殖秋風颯颯生租吏相催逼怒目坐我牀懷中取官勅攬去忍無言禍至恐不測爾輩顧何知夜夜鳴我側嗚咽入空房月暗風沙黑

韋人鳳 一首

人鳳字六象武康人

遺民詩六象有盛名詩以蒼健爲骨秀美爲澤

南山

家住南山下荒村只似廬春風三徑草夜雨半牀書石戶藤
花合茅檐竹影疏溪邊堪泛棹欲傍五湖漁

李瀚二首

瀚字士翔揚州興化人

遺民詩士翔有才名爲文奇拔詩亦超越甲申後逃
於禪具老人欲授以杖拂辭不受

雨夜

積雨侵階滿茅堂可浴鷗妻孥十口聚燈燭五更愁
甌麥春苗假溪田水苻流野人思見日偶語立沙頭

送顧叔向之湖南

七月揚舫去淒淒荆楚游江山仍接漢辭賦且依劉旅興桃源路鄉心明月樓雁書衡嶺盡目斷九疑秋

主貴一 二首

貴一字象山揚州興化人

三月三十日

亭樹蒼茫綠牆花厯亂紅開樽聊細酌今日對春風

送吳甥夢祥入都

古驛風沙送馬蹄川原極目夕陽迷搖鞭莫向天山去望帝經春滿路啼

苗君稷 一首

君稷字焦冥一字有邵永平人

立秋前二日懷剩公

坐惜秋將至思君在翠微山空花自落林靜鳥還飛策杖尋
溪水牽蘿挂衲衣涼風送殘暑吾欲叩禪扉

程岫一首

岫字雲家歙人有江村詩話

遺民詩雲家父懋衡甲申之變不食死博學篤行守
先人之志與係豹人陸懸圃吳野人交善吟詠終老

贈徐鳳麓

積雨消春日羈人歎暮年淮流寒照樹鄉夢夜聞鶉舊業浮
雲外遊裝短棹前親知零落盡去住總凄然